

東
華
續
錄

東華續錄

同治七十五

臣王先謙敬編

臣張式恭恭校

冬十月甲辰朔撥帑銀八十萬兩濟榮澤工需○諭麟興撥解巴里坤兵餉○丙午諭軍機大臣等有人奏已革雲南總督張凱嵩前在廣西辦理軍務避重就輕居心壅蔽克復山澤後泗郡乞援擁兵不救以致泗城歸順龍州相繼失陷縱寇殃民咎有應得該革員升任雲南總督不願赴任屢次藉詞遷延平日貪婪官民交怨擁費何止百萬請飭罰銀充餉等語張凱嵩規避雲貴朝廷洞燭其情是以將其革職至在廣西巡撫任內貽誤軍事婪索屬員如果屬實大干法紀蘇鳳文久官粵西知之必悉著卽確切查明據實具奏毋稍徇隱原摺片著鈔給閱看將此諭令知之○逆匪

吳亞終竄越南木馬諭蘇鳳文馮子材會籌速剿○丁未諭軍機大臣等庫克吉泰劉典奏西路各軍追剿賊匪情形一摺雷正綽黃鼎所部在靈涇一帶剿賊屢勝總兵黃超羣亦於甘泉境內擊敗董志原竄匪餘賊糾黨攻撲宜川縣城復蜂聚於絳桃村經庫克吉泰等檄令張雲松嚴守要隘扼賊南竄之路並飭劉端冕等分道援剿著卽催令該員等迅速前進務將此股賊匪盡數殲除毋令竄逸涇靈境內見無賊蹤邠三中宜等處防範雖嚴尤當格外慎重免致逆股尋隙內犯至邠延一帶兵力尙單董志原回逆糧盡計窮難保不圖竄往肆行擄掠該處防剿均當妥籌兼顧左宗棠已飭卓勝軍先行入關卽著庫克吉泰劉典檄飭該軍迅赴宜川將該處賊股剿盡卽會同劉端冕所部扼要駐紮毋任匪蹤東竄左宗棠仍當督率各軍剋期入陝相機剿辦以竟全功將此

由五百里各諭令知之○戊申賜陳桂芬等七十八人武進士及第出身有差○己酉諭李鶴年飭張曜軍迅赴榆林○辛亥諭軍機大臣等穆圖善奏進剿河州回匪獲勝請旨速解餉銀一摺河州回匪投誠後延不呈繳馬匹等項意存反覆自難稍事姑容見經穆圖善派令總兵范銘攻克綠麻景古城等處賊巢疊挫兇鋒勦辦尙爲得手穆圖善見在復親赴狄道督軍進剿著卽激勵諸軍奮力攻擊迅圖掃蕩如有畏罪投誠者當察其是否真心悔悟不可輕墮術中致誤戰事大軍後路尤宜妥籌兼顧其西甯回匪仍當會商玉通相機辦理甘省餉需支絀軍士枵腹荷戈殊深廬念據穆圖善奏稱各省應解甘餉除江西九江關協濟銀二十萬兩山西河東四川省城解到銀數萬兩外其餘由鄂臺經收各省協餉數月之久仍未解到著戶部迅卽行令應協甘餉省分各督

撫趕緊籌解源源接濟並飭鄂臺將勻撥甘省餉銀速卽撥解毋再延緩致誤大局將此由五百里諭令知之○飭各省速撥西征軍餉罷借貸洋款議○乙卯諭軍機大臣等文麟奏馳抵哈密籌辦情形一摺哈密自被賊擾後城垣坍塌地方彫敝文麟見已抵任自應將善後事宜妥爲籌辦應否改設城垣或將舊城重加修葺著卽相度地勢詳慎辦理葫蘆溝等處見有賊匪竄擾並著派兵搜勦毋任滋蔓威儀等營分紮哈密塔爾納沁等處如已足敷分布卽可將巴里坤派來之兵撤歸本城惟哈密巴里坤兩處唇齒相依文麟務當隨時咨商伊勒屯等互相聯絡以壯聲援哈密軍食缺乏全恃後路轉運景廉見駐安西著將安敦玉應辦糧石設法催齊源源運解並著文麟將蔡巴什湖屯田認真興辦暨塔爾納沁附近雪山一帶屯田漸次推廣俾資接濟該城籌辦善後

及應發兵餉需用孔亟著鄭敦謹將應解新疆餉銀寬爲籌撥迅速報解並著定安麟興榮全錦丕勒多爾濟於山西餉銀解到時卽行轉交該城催餉委員押解赴營毋稍延緩嗣後遇有指撥哈密之餉他處不准擅行截畱致誤要需將此由五百里各諭令知之○丙辰諭軍機大臣等穆圖善奏官軍渡洮擊賊獲勝見飭諸軍由高家集進剿一摺河州踞匪與甘肅省垣僅一洮之隔經穆圖善親督諸軍渡河會剿將高家集堅巢攻拔以次平毀鄧家灣大草灘清水溝蘇家集等處賊堡共斃賊數千救出難民甚多奪獲軍糧器械無算剿辦尙爲得手所有出力各員并准穆圖善存記俟續有戰績再請獎勵陣亡將士並著查明請卹賊匪見奔竄泰子寺勢漸窮蹙該處城大而堅山高路險必須先將附近各賊壘掃蕩以全軍四面圍攻乃可一鼓殲滅卽著穆圖善激勵各將

士乘此聲威由巴池溝等處轉戰而前迅復河州爲埽穴擒渠之計其投誠良回並著穆圖善妥爲安撫以示招徠將此由五百里諭令知之○諭馮子材奏慶遠南太鎮安各邊境漸次肅清一摺廣西慶遠南甯太平鎮安各屬匪勢延蔓經馮子材分飭各營痛加剿洗將各處匪巢攻拔多處左江軍務已稱得手而右江路匪吳亞終句結鎮遠上映向武下雷各積匪竄併平馬嘯聚感墟滋擾天保縣屬下崗一帶復經馮子材親往龍州督隊兜剿疏通右江運道各路積匪均已次第鏟除惟吳逆竄併越南木馬邊隘甚多匪勢尙熾亟應迅速翦滅著蘇鳳文馮子材會商調度將積年巨匪趕緊埽蕩並將各邊隘迅圖廓清以弭後患再廣西記名提鎮人員中如有曉暢戎機長於訓練能實心實力整頓營務者著蘇鳳文悉心查察出具切實考語隨時奏聞候旨錄用將此由五

百里各諭令知之○兗山東截漕入萬石賑濟南武定被水災民

○丁巳 文宗顯皇帝聖容 實錄 聖訓尊藏禮成予護從王

大臣議敘○諭內閣刑部奏遵議已革大員罪名一摺已革布倫托海辦事大臣李雲麟不知體恤民勇以致造言煽變實屬撫馭無方該部議以發往新疆係屬照例辦理惟該革員在新疆獲咎未便再行發往李雲麟著改發黑龍江充當苦差以示懲儆○戊午命服闋禮部右侍郎李鴻藻仍在弘德殿軍機大臣上行走○命山東布政使潘鼎新赴陝西軍營交欽差大臣左宗棠差委○胡家玉請濬黃河故道以利漕運命曾國藩等集議以聞○庚申諭軍機大臣等李鶴年奏檄催豫軍剋期入晉遵飭張曜改赴榆林請將陝省募勇滋事員弁懲辦各摺片張曜一軍已於本月初九日北渡卽著李鶴年飛催該提督兼程前進迅赴榆林與金順

聯絡防勦以固秦晉北路並嚴催宋慶趕將舊部招集星速由豫入晉駐紮汾州以重防務該軍應需貲糧等項著李鶴年先爲製備俾宋慶回豫後即可趨行免致稽延貽誤豫軍西征餉需軍火轉運最關緊要李鶴年已派員在澤州地方設局經理並著鄭敦謹一體督飭妥辦毋令稍有缺乏懷慶府屬地方於左宗棠督師過境時突有游勇冒充官軍滋事劫搶傷人之案層見疊出該處瘡痍未復何堪再遭擾害卽著李鶴年飭令楊長春會同地方官嚴密查拏盡法懲治以靖閭閻並著左宗棠嚴查如有隨營游勇在外滋擾者卽照軍法從事毋稍徇護劉典以親軍缺額派副將劉秀桃參將陳鳳林赴豫招募步隊數百人充補該員等輒濫收馬步至三千餘名之眾沿途漫無約束淫掠毆搶疊斃民命閭鄉一縣被害呈訴者已一百五十餘起其他可知殊堪痛恨劉秀桃

陳鳳林著卽革職並著劉典將縱勇擾害各節逐細查明按律究治並勒令將犯事勇丁交出押解赴豫正法梟示以昭炯戒此項新募之勇到營後如須酌量遣撤務當另派妥員分起押送毋使再滋事端將此由六百里各諭令知之○湖南巡撫劉崐奏添調兵勇赴黔剿辦苗匪得旨著卽檄飭黃潤昌統率所部迅赴沅州會商席寶田相機前進併力攻剿○以科布多守城賞土爾扈特郡王淩札棟魯布親王銜○辛酉于江蘇殉難知府于醇儒建祠○癸亥諭軍機大臣等蘇鳳文奏逸匪麇聚越南復窺太郡見籌進剿並各屬剿辦土匪情形各摺片賊匪吳亞終等遁入越南境內麇集諒平木馬九卦等處分股擾及太平邊境雖經馮子材派兵分剿攻破丁村壩墟等處賊巢而該匪復敢攻擾龍州下凍竄距憑祥土州匪勢甚爲猖獗太郡各屬與越南邊境相連該處防

兵甚單難保該逆不乘隙回竄且此賊一日不平非特內地不能安堵卽越南邊境被擾朝廷一視同仁亦豈能置之不顧著蘇鳳文會商馮子材督飭官軍會合夷兵迅圖進剿務將此股賊匪悉數殲除不得以賊去稍遠停兵不進敷衍目前致成不了之局所有應用軍餉等項並著源源籌解毋令缺乏其太郡防務並著飭令徐延旭添募勁勇認真堵禦毋稍疏懈來賓象州等處伏莽尙多蘇鳳文當分飭在事文武實力勦辦次第廓清並飭賓武永等州縣查拏逸匪妥籌善後俾地方日有起色另片奏據馮子材咨稱道員覃遠璉收復歸順州城有給賊銀兩之事如果屬實荒謬已極著蘇鳳文確切查明據實參辦毋稍含混將此由五百里各諭令知之○廣四川崇慶州學額一名○甲子飭各省迅解河工銀○于山東陣亡道員李澤長祭葬世職○乙丑諭軍機大臣等

穆圖善奏官軍擊退徽成逆回遣散靜甯土匪並清水縣城解圍
請將辦事回目酌保各摺片徽成兩縣回股經敖天印傅先宗等
合力勦擊賊眾紛走境內一律肅清其靜甯土匪亦經舒之翰等
將首犯樊國昌擒拏正法餘匪分別遣散辦理尙屬認真該州與
清水相距甚近無兵防守仍恐爲竄匪所乘卽著檄飭舒之翰等
責令張貴率領所部分駐水洛城等處並令善山保帶領安楨桐
二營分駐古城一帶以資保衛崔三大股猝撲清水縣城副將敖
天印親督各營乘夜潛襲斃賊甚多城圍得以立解惟訊獲賊供
該逆意欲直犯秦州以圖飽掠該處尙稱完善久爲匪黨垂涎仍
著嚴飭該副將督率兵勇相機堵禦毋得稍有疏虞匪首楊生魁
等在同心城滋擾經回目馬朝清馬忠海等將首夥各犯槍斃救
出難民地方賴以安靖該回目等居心樸誠甚屬可嘉所有此次

出力紳民著准其擇尤酌保數人以昭激勸將此由五百里諭令知之○飭山西迅解歸綏防兵欠餉○丙寅命江蘇月撥劉松山軍餉六萬兩○吏部左侍郎吳存義卒予祭葬○追予江南江甯殉難已革廣西巡撫鄒鳴鶴祭葬世職如巡撫例諡壯節○戊辰諭軍機大臣等劉嶽昭奏進剿尋匪疊勝並親赴文筆山相機布置及覆陳到滇後籌畫情形各摺尋甸賊匪經李家福等連番剿擊斬獲甚多而嵩明踞匪分路出巢希圖牽掣兵力劉嶽昭抵文筆山法鼓山察看情形將各要隘嚴爲防守李家福等復將新莊魯背等處賊壘乘勢環攻賊不敢出其法鼓山左右村莊及小坡賊壘一律攻克剿辦尙屬得手惟北路餘匪勢仍踴張該督見已馳回曲靖自當嚴飭李家福全祖凱督率各軍迅拔尋城不得以東路稍清輒形鬆懈至覆陳辦理梁士美等各節尙屬事出有因

該督身任兼圻受恩不爲不重滇省軍事方棘務當與岑毓英等和衷共濟綏奠邊陲其於捷報掩飾等情尤當存有則改之無則加勉之心方爲不負委任劉嶽曙計已入滇著卽檄飭該道員會同李家福等軍分投進剿以壯聲援其省防事宜仍著督飭宋廷春等時加防範毋稍疏虞將此由五百里諭令知之○予雲南陣亡遊擊張肇培被戕知縣盛光斗等祭葬世職○已巳諭內閣山東布政使潘鼎新奏懇賞假回籍葬親並帶勇回皖分別辦理各摺片著照所請潘鼎新准其給假三箇月回籍葬親並著於假滿後挑選所部勇丁統帶赴陝聽候左宗棠差遣以資攻剿○諭軍機大臣等曾璧光奏官軍攻克鎮甯苗逆老巢興義縣城被陷旋復成耀星等軍餉請仍由川省撥解各摺片苗逆黃大老板竄踞鎮甯州十三旗地方窺伺郎岱等城經官軍堵剿獲勝先將羊昌

河玲瓏賊壘平毀進攻十三旗老巢陣斬賊酋黃老五唐開科等二十餘名斃賊無算立將十三旗克復該逆由關塞遁去卽著曾壁光檄飭畢大錫等乘勝搜剿務將逆首黃大老板嚴大五等擒獲正法以淨根株六合團首黃汰尙踞烈山堡恐與各屬餘匪勾連磨聚復肆蔓延並著曾壁光嚴督該文武員弁力圖聚殲毋畱餘孽在事出力各員弁紳團准由曾壁光擇尤奏請獎勵毋許冒濫馬仲金萬照等匪勾結爲患曾壁光當檄飭該文武等會合滇軍相機堵剿毋稍疏虞川省添撥陳希祥一軍著曾壁光檄飭迅速赴防與成耀星各將濫練土匪實力剿洗卽合軍由安順進剿興義貞豐等處回逆一面檄催葉正邦迅由西林渡江以收夾擊之效成耀星陳希祥兩軍糧餉軍裝著吳棠照舊源源撥解毋令缺乏將此由五百里各諭令知之○予哈密陣亡三品銜軍功張

和祭葬世職○壬申諭內閣前因曾國藩奏稱已革廣西巡撫鄒
鳴鶴在江甯殉難大義凜然當經降旨加恩照巡撫例從優議卹
並准其予諡茲據御史朱鎮奏稱該故員前經陸建瀛奏請幫辦
城守事宜當江甯失守後該故員扶病避匿民居被賊所殺並非
力竭捐軀者比該御史當時在籍鄉居自係確有聞見所有前准
曾國藩請將鄒鳴鶴照巡撫例從優議卹並加恩予諡之處均著
撤銷○癸酉諭軍機大臣等李鶴年奏張曜由澤州赴防宋慶起
程來豫並會同蘇廷魁諏吉興工一摺張曜一軍旣行抵清化鎮
卽著檄令由澤州兼程前進迅赴榆林並咨明鄭敦謹查照辦理
宋慶於本月二十日前由籍起程此時計已抵豫該提督所部應
需貲糧等項業經李鶴年先期飭備自不至於濡滯著卽飭令肅
伍邁行星速赴汾擇要駐紮以重冬防榮工已於本月二十一日

興工先由西壩進占著蘇廷魁李鶴年督率道廳及在工員弁懷
遵疊次諭旨實心辦理務期年內合龍以慰厯繫沁河漫口工程
並責令尹耕雲綸恩會同勘辦仍著該署河督等將開工後堵築
情形分晰具奏續撥部餉六十萬兩均由順天府委員領解著李
鶴年派委妥幹員弁沿途迎提迅速到工毋稍延緩將此由六百
里各諭令知之○諭蘇鳳文奏接據越南國王咨文派兵協剿各
等語逆匪吳亞終勾結越南降匪謝靜川等憑險抗拒勢甚猖獗
前諭蘇鳳文等迅督官軍會合夷兵夾剿剋期殄滅茲覽越南國
王咨文是其待援情形實爲迫切該國久列藩封恭順有加乃任
內地匪黨擾及邊隅何以副朝廷懷柔遠人之意歸順憑祥等處
既有踞匪兵力不能兼顧卽著蘇鳳文馮子材等添募勁旅分道
並進越境疾攻會同越南夷兵兩面夾擊迅殲醜類以靖邊疆不

得以越境險遠置之不問爲越南所笑所需糧運軍火並著蘇鳳文寬爲接濟毋令缺乏再輿圖爲行軍所必需著該撫將見在本省用兵及有賊處所詳細繪圖貼說具奏將此由六百里各諭令知之○予湖北陣亡縣丞鄒永喆等祭葬世職○是月蠲緩直隸安州等四十五州縣被水被雹新舊額賦河南祥符等二十六縣被災被擾新舊額賦山東德州等二十五州縣德州等三衛被災被擾新舊額賦並永阜場竈地錢糧貸河南滎澤等十三州縣被水災民一月錢糧

十一月甲戌朔諭軍機大臣等前因棍噶扎勒參請派烏科兩城防兵剿賊等情諭令麟興等妥商辦理茲據奏稱烏城防兵僅止一百數十名係爲彈壓地面而設此項防兵爲數無多自應飭令照常認真操防毋稍疏懈布倫托海賊匪近日情形若何亦未便

任其蔓延麟興等業經咨商福濟錫綸相機辦理一俟商議就緒卽行奏聞如須調蒙古官兵著卽將備調之五百名派員管帶前赴福濟等軍營聽候調遣棍噶扎勒參請調馬匹見值大雪封山勢難運解應否派撥前往並著咨商福濟錫綸斟酌辦理布倫托海雖距烏城較遠麟興錦丕勒多爾濟榮全總當隨時確探情形與科布多大臣豫商籌辦顧全大局不得以一味因循致有貽誤將此由四百里各諭令知之○廣江蘇六合縣學額六名江甯上元各五名安徽桐城三名○乙亥諭內閣前因江甯克復洪逆伏誅經禮部援引成例奏請編輯方略時因遺孽洪幅瑱尙未授首擒逆亦未埽除暫緩纂輯茲復據禮部奏粵擒各逆肅清請一併纂修方略等語因思逆氛飈起流毒海內十有八年我 皇考文宗顯皇帝命將出師救民水火憂勤日昃 廟略宣昭朕御極後

欽承 先烈並仰遵 慈安皇太后 慈禧皇太后懿訓激勵將士疊殲羣醜幸賴 昊蒼默佑粵捻各逆次第蕩平迄今追溯艱難敢不愆後懲前益深兢惕著照禮部所請編輯成書俾資省覽卽派軍機大臣恭親王文祥寶鋆沈桂芬李鴻藻充方略館總裁督飭該提調總纂等詳慎分編毋遺毋漏所有應辦各事宜並著恭親王等隨時斟酌辦理○丙子左宗棠奏 臣於九月二十七日孟津渡河後按站趨行沿途得各路軍報知回土各匪雖肆鴟張而各路布置旣得地勢將領復極一時之選大局穩固差可無虞私懷稍慰十三日行抵西安庫克吉泰劉典與 臣晤商一切連日會籌軍事調度軍食而甘肅提督高連陞署漢中鎮總兵李輝武道員黃鼎魏光燾聞 臣西還各自防所來見稟商軍事 臣比逐一詳詢益知劉典運籌之審陝西全局東北延榆綏一帶爲甘肅土

匪所侵擾人數甚多潰勇游勇飢民居其大半亦有甘回附麗其中西南敗回盤踞董志原老巢號稱十八營其地本甘肅甯州轄境北接慶陽南連邠鳳東北直達鄜延陝回而外甘回鎮回之嗜亂無歸者漢民之被脅從教者亦屢雜其中合計兩路回土各匪人數近二十萬幸將士一心每戰皆捷斬馘過當 皇威暢而人心定大局應可無虞所有近時各軍獲勝情形謹會銜馳報見與劉典熟議乘勝進偪分途勦辦以速戎機高連陞一軍分營進駐廟莊楊家店一帶周紹濂一軍分營進雙柳樹魏光燾一軍由張村進王家角以漸達慶陽劉端冕一軍仍駐鄜州甘泉以扼東西關鍵此爲中北路之兵調吳士邁全軍赴鳳翔與黃鼎邠州之軍張岳齡喻步蓮汧隴之軍李輝武寶雞之軍相聯絡臣復調步隊兩營馬隊八營赴鳳翔豫備會勦此爲西南路之兵兩路皆所以

勦回也矣士邁劉端冕旣勦敗楊馬諸回酋鄜州洛川甘泉肅清
劉厚基成定康旣勦敗高李諸土匪延長延川青澗綏德亦漸有
肅清之望臣見調郭運昌所部卓勝馬步八營由同州韓城赴宜
川以進延長適郭運昌暴得寒疾甚重行至同州馳稟請假見令
提督蔡光武代領其軍二十三日始拔營前進其劉松山全軍見
在洛陽整理尙須時日臣擬飭其由茅津渡河入山西乘冰橋赴
陝以期周密見據韓城縣稟禹門以上冰橋早成雖晉防今歲增
兵修堡守禦較嚴土匪伎倆遠不如捻然臣親承慈諭勦賊須由
東而西不敢不慎益加慎其榆林有金順之馬步十二營改兵爲
勇四營兵力本不爲單惟金順所部終須移駐靖遠一帶頃接張
曜稟初九日始由汴啟行計抵榆林尙須月餘非俟張曜到後金
順不能移赴靖遠且所部英禮十營慮不足恃也此東北路之兵

尙待綢繆者臣前疏請增歸綏之軍未荷俞允竊慮終須稍畱

聖意頃據黃鼎面稟董志原回巢所需百貨近從金積堡遠自歸化城轉販而來上年包頭地方曾有回逆買馬之事似所稟未盡無因大抵陝甘之患未平歸綏之防斷不宜弛以蒙兵緣營駐防之兵均難深恃而地當京畿右臂設險宜先期明宣府大同邊防並重良非無故也伏乞聖慈曲垂鑒納臣所帶親兵一營後路

五營吉林馬隊三起見結營西安城西擬俟各軍到防河東之餉提到再相南北兩路緩急赴之至回土各匪聞臣軍回陝亦頗懷

震懼見據各路稟報有移巢者有乞撫者然皆未足信惟當不執成見慎以圖之又奏陝甘各軍攻勦靈台涇州一帶竄匪獲勝該逆敗退董志原並分股竄擾宜川地境撥營勦辦各情形業經庫克吉泰等陳報九月二十一日洛川守將劉竹田訶知回騎數百

竄至龔家原之葫蘆河賊巢克之跟追至王家河賊復回拒官軍奮威衝殺斬悍賊十餘騎而還二十九日賊騎數千由甘泉府村竄入直趨勞山分股竄及麻子街提督劉端冕所部分防甘泉道左鋪之左營總兵銜副將劉士祈聞警率隊至老人倉擊之斃賊不少逆勢頓挫仍由原路竄去少頃大股復從麻子街蠶擁而至劉士祈留總兵陳光明率三成隊守營派該營後哨列隊河溝防後路自率親兵及三哨七成隊出擊正酣戰間另股逆騎萬餘忽繞由對岸山溝衝至駱駝原將後哨重疊圍裹劉士祈一面飛報鄜州請援一面率隊回救而山後騎步各賊併勢壓下又圍劉士祈隊劉士祈縱橫血戰猛氣甚厲賊欺其單旋卻旋進弁勇傷亡已多劉士祈身帶十餘創猶手刃悍賊數名力竭而殞其前哨哨官雷陝參將曾恆勝並遊擊魯桂德把總謝文泰均因翼蔽劉士

新植立不移同歿於陣并勇陣亡者七十餘名是日劉端冕探悉大股竄至鄆州城北二十里之劉家岔一帶率中後兩營往勦中途得劉士祈急報卽令副將喻先知率後營從榆林橋徑趨道左鋪見該逆正圍攻左營牆壘卽麾所部衝殺圍解賊遁復併力而前急趨劉士祈戰所則已無及矣劉端冕將岔口村賊擊敗後率所部合隊追勦至麻子街斬殿後賊十數名生擒七名據供此股回逆係余馬兩僞帥率眾五萬分作三股一攻鄆州一竄延安一竄宜川等語訊畢斬之劉端冕令後營暫駐道左鋪自率中營回鄆城十月初二日回逆大股分竄開撫鎮廂西鎮馬蹏莊舊縣等處分防舊縣之總兵凌默發堅守舊縣城堡逆不得逞逆騎數千竄至牛德鎮將趨鄆州劉端冕聞報飛飭駐道左鋪之左後兩營準備俟該逆回竄麻子街卽出隊截擊一面督率中前兩營及馬

隊赴郿截勦行十餘里遇逆騎數千飛奔而來馬隊向前衝殺斬悍賊十餘名賊瞥見我軍步兵隊大至卽回馬狂奔劉端冕督隊猛追將近牛牛鎮該逆大股列陣平原意圖拒敵我軍排陣以進始以劈山礮向賊聚處轟擊斃賊百餘名繼以洋槍連環迭進戰十餘回合擊斃悍賊十餘名該逆漸卻官軍奮威衝殺賊益不支遂向英汪鎮鼠竄而去劉端冕仍率隊回郿此九月二十九十月初二等日劉端冕勦賊獲勝情形也其由英汪鎮竄至吉子峴之賊已及洛川屬之交口河一帶提督周紹濂率中後兩營於初三日馳赴鞍子頭會合所部左營扼之交口擊敗之賊復分兩股遁去其一股竄赴洛川東北兩鄉圍攻樂安金牌草地各寨適_臣劉典調赴洛川勦賊之員外郎銜中書吳士邁先日趕到縣境旋令禮營哨官都司李耀卿等率隊赴援草地民寨令副將謝盛枏率義

營援黃章民寨令遊擊余清勝率智營援金牌民寨令副將劉竹田率鎮西營提督銜邱時成率馬隊參將劉厚福率仁營援樂安民寨初三日卯刻分四路而進劉竹田等行近樂安寨忽聞該寨已於先日被賊攻破劉竹田卽率所部直撲南門寨中踞逆方列械抵拒因見仁營與馬隊由左右鈔出恐斷後路遂盡棄糧畜由北門竄去旋復勒馬擁眾拒敵劉竹田劉厚福邱時成等三面夾擊斃賊多名賊遂北竄謝盛枏余清勝至黃章金牌等寨賊望見旗幟亦卽解圍北竄李耀卿等至草地該逆正在環攻民寨各路敗賊併集一處李耀卿大呼陷陣賊勢披靡且戰且走少頃仁義智營與馬隊鎮西各營跟蹤追至洛川縣知縣王浩鄜州州判周貴庠各督團丁亦到四面夾擊斃賊多名奪獲糧畜甚夥該逆由舊縣一帶竄去我軍追至田家村忽據探報東鄉有回騎數千亦

在圍攻民寨遂令收隊回援適東鄉槐柏塔子坪五十村童張彭
溪北頃南頃各寨民人來營請援吳士邁卽畱邱時成馬隊與鎮
西營畱防北路兼顧糧運令仁義禮智四營於初四日赴東鄉進
剿行六十餘里至槐柏寨已近黃昏該逆聞風均退向塔子坪一
帶塔子坪距槐柏十五里北頃距槐北二十五里南頃距槐柏三
十里爲該逆回竄必由之路遂傳令二更造飯三更出隊維時總
兵朱德樹知縣張遂生率信誠兩營隊伍亦至遂分三路進剿禮
仁兩營進剿塔子坪義營與知縣王浩率團丁進剿北頃信誠兩
營進剿南頃智營伏於南頃三里外之溝口並派親兵兩哨伏於
溝口左右五更時五營齊撲大小槍礮連環轟擊聲震山谷逆賊
倉皇失措莫知所之轟斃焚斃墮巖谷冒樹石斃者不計其數
其由各路竄遁之賊甫近溝口復經智營伏兵邀擊鮮得脫者計

斃賊約二千有奇奪獲馬騾千餘匹洋槍二十三桿生擒四十三名訊明斬之其各路糧畜先派同知李謙升知縣蕭啟基從九羅日章縣丞曾貴和分督親兵四處收集隨傳就近各寨民自行搬取糧食認領耕牛當時未經認領者卽交洛川縣散給貧農惟戰馬騾驢畱賞兵勇此十月初三四等日吳士邁一軍勦賊洛川克獲大勝之情形也其由吉子峴退竄者初四日提督周紹濂飭副將周玉林率隊赴安子頭與左營合駐初六日逆騎數百竄至石家峴大股數千聚踞古樓村周紹濂卽夜令副將劉甫田率右營於初七日出隊石家峴令前左兩營總兵董玉春及周玉林各率所部取道阿當寨由右路直趨古樓村除畱隊守中部城外自率中營督同參將毛正明率後營中右後三哨取道王村由左路進赴隆坊令總兵李良穆分率後營前左兩哨扼伏王村要隘以防

石家岷竄逆周紹濂抵隆坊時前左兩營已與該逆接仗兩路列隊槍礮環攻該逆漫山遍野躍馬衝撲周紹濂率中營四哨由右向古樓村包鈔前進飭毛正明率所部及守備周崑率中營後哨由左進維時前左兩營已擊斃當先悍逆十餘名落馬左右鈔出各弁勇銳氣百倍進戰愈力總兵趙興雲副將陳高華都司周曙良各率隊於右路奮勇衝突而前毛正明下馬挺矛殺入副將劉鳳舞遊擊周雲吉守備周崑率隊隨之兩路槍礮交轟賊益不支紛向馬鞍村原路竄去計共斃賊三百餘名會雪勢愈勁山路凝滑收隊而返此十月初七日周紹濂剿賊中部獲勝情形也同時竄擾西路者回酋馮阿渾郭阿渾張萬寶馬正和馬長順馬文舉等十月初一日由董志原糾黨內犯竄至隴州陽家河一帶連互四五十里初三日直逼城下候補知府喻步蓮率所部義勝三營

截擊該逆且戰且走一股萬餘人由隴城西走曹家灣折竄州南
白家河朝天坡等處一股七八千人由隴城東走折竄州南蘇家
灣臨林川入渡等處並分屯杜陽迤邐下趨悍騎駛至距汧陽二
十五里之寇家河而白隴城南竄之賊尙紛至未已甘肅臬司張
岳齡慮上良朝那之賊由新集鎮迸犯大灣嶺派參將胡弼武帶
隊馳赴龍頭伏龍等堡以遏闢入馮坊河之路復督各營扼剿於
寇家河初五日入渡之賊竄擾新街鎮零騎擾至寶雞之縣頭鎮
初六日道員魏光燾率馬步七營馳赴汧陽會同張岳齡進剿初
七日出隊行至草碧灘遇賊騎擊之返奔忽大雨如注將士衣履
盡濕遂暫駐稍憩是日署漢中鎮總兵李輝武亦由寶雞防所率
部馳抵新街初八日大雪難行探報回逆有由上良東趨者李輝
武恐其乘虛闖入寶鳳仍率隊回寶雞張岳齡等調賊尙踞隴境

初九日雪止乘霧進抵杜陽查探該處係逆酋張萬寶所帶聞風宵遁其自八渡竄出者因官軍攔截仍伏山中未刻各營抵隴州與義勝各營連絡分路探防諸賊以官軍大集先後乘夜出竄自南而西距州城十餘里如蠅如蟻絡繹不絕知府喻步蓮獲賊探據供馮馬各酋原擬飽掠後由杜陽草碧分隊回巢不料官軍大至祇得傍州城奪路夜竄喻步蓮密派勇丁二百名潛伏要隘截之斬獲頗多初十日卯刻張岳齡率所部出西門至溫水溝見該逆滿布川原馱糧絡繹向西北楊家河一路而走斷後騎賊三千餘人一見官軍卽乘隊衝突張岳齡派副將李獻厚知縣鍾顯謨率中營從右進總兵黃儲寶州判唐楚榮率左營從左進總兵蕭賞謙府經歷余修鳳率右營從平頭原下擊親督知縣余家珍帶親兵繼之道員魏光燾派總兵吳禧德周勝元各率馬隊踵至張

兩翼包鈔該逆分投抗拒都司張佐廷率十餘騎首先突陣羣斃馬賊多名參將陳清輝左手受矛傷力戰不退吳禧德等馬隊奮勇鈔截平江營劈山礮中羈逆勢不支紛紛敗潰然猶時散時聚奔而復戰正在追殺間忽把關口橫出一股前來迎敵喻步蓮繼至整隊當之總兵蕭羣魁擊其左參將龔曉亭擊其右參將劉寶元敵其中喻步蓮自率撫標馬隊及中營親兵緊相策應該處深溝陡岸逆騎不能馳聘亟以排礮轟之逆眾擁擠自相踐踏我軍齊隊進擊該逆棄械狂奔劉寶元率馬勇跟追約三里許爲該逆伏騎所困總兵蕭羣魁等率哨弁遊擊張金榜千總彭雲開外委魯大元策馬赴援步隊續至該逆始大敗而逃於是恪靖馬隊逐北谷中平江義勝各營躡蹤原上遇賊卽殺伏屍縱橫雪地爲赤直至距城四十餘里之李家河蘇家園始行收隊魏光燾於先夜

五更率武威升奇各營出隊向南原潛伏天色甫明該逆果由山內蠶擁而來爲數不下萬餘伺其過半卽埋伏兵齊出截擊該逆猝不及防紛紛驚潰立斬四十餘名羣逆忽麕聚併力轉鬪我軍列陣偪勦槍礮齊施悍黨下馬持矛猛撲各將士奮力相搏鏖戰逾時升用提督左日升總兵于奇泮同副將石茂林陳家貴遊擊張清和于維槐等各手刃數賊該逆敗近河岸猶敢回拒升奇兩營協力奮擊賊乃大敗左日升等追殺二十里至米家山魏光燾督武威中後兩營追至玉村川逆酋立馬橫刀嗾黨死鬪魏光燾飭總兵熊道濱參將王致和由小路鈔賊之後參將何昌梓由大路擊賊之前兩面夾攻遊擊魏紀鑒率親隨馬隊陣斬賊酋一名賊益震駭追殺三十里至余家堡沿途擒斬纍纍日晚始行收隊張岳齡自楊家河折回州城南抵太平堡得悉武威等軍獲勝追

奔遂列陣南原至此始行會合收隊回營尙恐南山內外餘匪伏匿爲患張岳齡等於十一日督同各營官帶隊分路入山搜捕均有擒斬隴州境內一律肅清是役共計殺賊二千有奇生擒三百五十七名奪騾馬千數百匹拋棄糧食填塞道路均任窮民收取訊據擒賊供稱逆酋聞大軍十萬西來亟圖廣擴糧畜爲分巢抗拒之計因窺隴州兵單可以飽掠不料鳳郡汧寶各軍迅集致受此挫訊畢分別斬釋此十月初四初七初九十一等日張岳齡魏光燾喻步蓮等勦賊大獲勝仗之實在情形也又奏接統領楚軍前路記名提督劉端冕稟報初九日訶知洛川逆回經吳士邁擊敗後復回竄郿州境袁家寨開撫鎮廂西鎮等處夜攻寨堡劉端冕卽飭總兵陳光明率中前左三營三成隊伍畱防郿城近隘飭右營及鎮西營於初十日馳赴舊縣會勦親率中前兩營由桐思

鎮前進午刻馳抵舊縣謀報賊尙踞袁家寨開撫鎮未動適大雪紛飛頃刻盈尺官軍亦難前進是夜四更雪止出隊十一日卯刻抵袁家寨比飭右營鎮西營繞高原下扼賊東竄中前兩營從正路進馬隊列高原上防賊包鈔天明直逼寨前賊聞鼓聲大震倉卒出寨拒敵官軍奮威衝殺立斬悍回百餘賊騎因雪擁山徑顛蹶不前官軍併力蹙之窘而東趨適遇左營鎮西營從寨東兜剿而上槍礮齊施斃賊不少賊向開撫鎮北竄官軍乘勝躡追沿途擒斬尤眾是夜收隊袁家寨四鼓出隊十二日黎明擊之開撫鎮鏖戰三時追殺十餘里斬賊四百級生擒賊目羅平兒等十七名賊向屈家灣英汪鎮一路遁走劉端冕慮其將由勞山麻子街道左鋪舊路歸巢飭右營鎮西營仍回原防自率中前兩營於十三日回廊飭駐甘泉之後營準備截擊十四日戌刻賊果由麻子街

道左鋪兩路回竄十五日中前兩營及馬隊五更出隊十六日甫抵道左鋪賊正搶渡官軍薄之溺斃中流者無數其由麻子街竄出之賊經後營截擊擒斬亦多計劉端冕一軍十一十二十五等日三戰其陣斬悍回千餘名奪獲糧食牛驢旗幟槍矛無數訊據生擒賊目等供同酋楊文治馬生彥等擬攻韓城作巢穴聞大軍自同州來遂決計西竄蹄巢十二日開撫鎮之戰楊文治左脅中礮子傷未知其死活也據此則由郿甘東竄回逆疊經痛剿兇鋒亦少挫矣又奏陝西延綏一帶甘肅土匪董幅祥李登等不時出沒股數甚夥除扈彰一股業於延安就撫外餘皆四出竄擾巖谷之間蠢屯蟻聚號稱十餘萬游勇潰卒黨附之者計亦不止數千據延榆綏鎮總兵劉厚基稟報由延安赴榆林署任行抵清澗訶知土匪於縣境攻寨掠食勢日披猖遂擬駐營搜剿九月二十五

日謀報縣城東北四十里有土匪大股圍攻師家溝一帶民寨甚急劉厚基卽派隊分道馳援副將李作福鄧登科都目姚發義先進乘其不備擊之斃賊二三百名羣匪敗退郝寨王寨圍解追過一山大股馬步各匪蟻擁而至劉厚基令總兵田玉廣提督王雲孚遊擊陳國珍分三路齊進親率馬隊繼之參將李恆勝張正喜鄧萬盛等首先陷陣立斬賊目數名賊勢稍卻劉厚基縱馬衝擊號鼓齊鳴三路畢集奮威衝殺銳氣百倍敗賊擁擠墮崖落澗者無算逐北至師家溝復前追十餘里始收隊而還計共斃賊千餘名生擒三百餘名奪獲馬騾驢千餘頭牛羊糧食甚夥訊據匪目李玉青余貴保供此股匪目爲匪首高幅祥所統之李雙夏李棟均甘肅固原州人此次由綏德州之雙湖峪入訊畢斬之是夜探報另股回眾正在九里山掠食勦敗之匪已到曹家溝圖與合勢

攻掠民寨劉厚基卽令各營向九里山進二十七日卯刻抵奧林寺分遣王雲孚遊擊陳國珍分由左右山路急繞賊後田玉廣由中路迎擊馬隊繼之鄧萬盛及清澗縣知縣趙聿灝帶練勇扼各隘口匪眾聞官軍且至率黨向前抗拒劉厚基度王雲孚等已出其後親督中路馬步各隊併力進擊正鏖戰間陣後槍礮齊震匪眾知官軍已繞出其後倉皇紛竄官軍四面縱擊計共斬賊千餘名生擒百餘獲騾馬二百餘匹追過曹家溝二十里至杜腰坪乃還此九月二十六七等日劉厚基進剿清澗土匪兩獲大勝實在情形也署綏德州知州道銜知府成定康緘報九月二十八九等日董幅祥李登等率眾數萬勾結回酋馬天喜突犯州境成定康得報後密率所部三營隊伍伏於田莊鎮之薛家寨初一日黎明大股驟至成定康出其不意麾所部三面截擊賊駭而奔官軍槍

礮刀矛並進娶時賊屍枕藉並生擒馬天喜計共殺賊四千有奇
奪賊騾馬二千有奇其詳細情形尙未據稟報初四日劉厚基飭
陳國珍王雲孚及副將胥榮富迎擊募家河掠食之匪斃匪數百
生擒匪目陳永思等七十五名奪獲旗幟軍械數百件騾驢四百
餘匹初六日接剿柴家坂攻寨之匪匪眾解圍鼠竄劉厚基於初
八日進綏德州 上諭軍機大臣等左宗棠行抵西安著與庫克
吉泰劉典會商調度乘此得手之際督軍分投進剿所有高連陞
等軍卽照該大臣所擬調撥扼紮以資分剿陝省土回各匪雖以
董志原爲淵藪而北路高樹嶺等處有回匪窺伺河干當此冰橋
已結尤當加意截其東竄之路歸綏一帶防兵不多朝廷亦深慮
其地廣兵單第恐淮軍前往扼紮人地不甚相宜著定安等隨時
斟酌情形如果兵力不敷防剿卽奏明於風土相宜地方酌調官

兵前往鎮攝陝省窺伺河干之匪已經官軍擊退難保不狡焉思逞總兵馬陞本係專防河保一路見在添調官兵千名卽著鄭敦謹督飭該總兵認真校巡遇賊卽擊並著嚴飭陳湜在中路巡防不得稍有疏忽張曜一軍已抵汾境備吉鄉有警准其酌畱數營以厚兵力宋慶前已赴豫著李鶴年仍遵前旨催令該提督統率所部迅速入晉扼紮汾州一帶毋稍延緩郭運昌見旣患病自應暫行調理前據英翰奏稱郭寶昌傷疾已愈添兵助剿卽著吳坤修催令剋期赴陝並著李鶴年檄令星夜遄行沿途毋稍耽延該提督素稱勇敢諒不肯稍有逗畱也陝西土回各匪雖有畏懼乞撫各情該將領等亦同心剿賊但當不執成見以收實效左宗棠久在軍中熟悉情僞必能調度合宜以副委任也將此由六百里諭知左宗棠庫克吉泰定安鄭敦謹李鶴年劉典桂成並傳諭吳

坤修知之○諭穆圖善奏官軍接仗獲勝進紮劉家坪督剿一摺
河州賊匪憑山踞險抗拒官軍經穆圖善飭軍分道進攻將清水
溝賊營並黨川堡逆巢攻拔善山保等軍疊敗大股賊匪攻克段
家坪等處老巢穆圖善已進紮劉家坪相機調度著卽分飭善山
保等軍由田家溝進梅開泰等軍由清水溝進兩面夾攻先克復
新路坡要隘以次進攻泰子寺三甲集再圖規復河州毋稍鬆勁
據獲賊供稱該逆見勾結撒拉回股俟洮河冰結竄擾官軍後路
又有約董志原陝回先搶鞏昌糧臺次擾狄道並知會米拉溝回
目分擾平番古浪之說與各營詳報略同該逆等紛紛蠢動無非
爲圖擾河州起見若能將河城及早收復則各路之賊自將聞而
裹足卽著穆圖善一面嚴飭各軍奮勇進剿迅拔堅城一面飛飭
敖天印蘇家良等迎剿陝回安防南路並飭張萬美黃有才力順

西路疏通運道其省城防務及狄道後路該署督並當妥籌兼顧
務臻嚴密將此由五百里諭令知之○予陝西陣亡副將劉仕祁
等祭葬世職○丁丑諭內閣朕叔遼郡王奕詒秉性端和持躬謹
飭自幼仰承 皇祖宣宗成皇帝慈愛我 皇考文宗顯皇帝誼
篤友于封爲郡王並令在內廷行走仍在上書房讀書迨朕御極
後派令管理武英殿中正殿事務俱能恪恭將事勤慎有加前因
患病未痊賞假調理復派人看視方冀舊恙漸痊長承寵眷遽聞
薨逝震悼實深著賞給陀羅經被派郡王銜貝勒載治卽帶領侍
衛十員代朕前往奠醊朕於本月十三日親臨賜奠並派總管內
務府大臣崇綸辦理喪事所有一切事宜均由官爲經理其餘飾
終典禮各該衙門察例具奏尋議上賜祭葬諡曰端○庚辰丁日
昌奏清釐江蘇積案詔如所議行○辛巳諭軍機大臣等岑毓英

奏官軍肅清晉甯州城餘匪及各路剿匪情形一摺雲南官軍攻克晉甯州城後該逆眾分西南東北兩路來援勢極兇猛經該撫派兵力剿擒斬甚多已將州城內外一律肅清其武定州城被圍日久經楊玉科等督軍固守該撫已函商劉嶽昭由晉甯撥兵援應著卽督率將士力圖攻剿迅解城圍激江尋甸等處賊匪亦已派兵協剿著俟得手後卽分派重兵進攻易門等處劉嶽昭見籌進剿尋甸著卽督軍分投進攻以壯聲勢該督有統軍之責自當分籌策應不得稍涉觀望附近省城逆壘著岑毓英會同馬如龍力籌埽蕩其省防事宜仍著督飭宋延春等隨時防範毋稍疏虞將此由五百里諭令知之○諭文麟奏行抵哈密籌辦一切並履勘城垣駐紮地勢及請飭烏科各城撥給駝隻各摺片哈密地當孔道自被亂後人物荒殘葫蘆溝等處賊騎時有窺伺著文麟督

飭魏忠義等勤加偵探隨時投勦以備不虞郡王伯錫爾之福晉
籌辦軍需能顧大局此次該回王又捐湊米麥以濟軍食實屬深
明大義卽著傳旨嘉獎並飭兵勇恪守營規各屬回部由各頭目
出具連環保結以固人心但不可稍涉煩擾文麟辦理此事務當
畱心體察妥爲勸導其蔡巴什湖屯田卽著酌量興辦不可畏難
自阻哈城殘毀已甚應否興修或擇地建築著文麟會商景廉相
度地勢奏明辦理如須另築並著繪圖貼說具奏以備考覈哈密
臺站曠廢亟應復設以利郵傳並轉運軍糧開辦屯田須用駝隻
馬牛甚多該處荒殘之區難以籌購亦係實情自應於附近地方
撥往卽著麟興榮全錦丕勒多爾濟奎昌明瑤分撥駱駝一千隻
牛四百隻馬四百匹馬鞍二百副所撥駝隻馬牛務選健壯適用
不得以羸弱充數其未到之先並著伊勒屯何琯先行借撥馬一

百匹以便文麟將哈密各臺站安設其頭三堡等處見在道路未通准其暫緩興復將此由六百里諭知麟興榮全錦丕勒多爾濟奎昌明瑤文麟景廉伊勒屯並傳諭何瑄知之○蘇廷魁請截留湖北京餉濟工需允之○壬午諭軍機大臣等景廉奏擊敗竄匪見擬移紮敦煌一摺肅州回逆分股竄入安西州境築壘盤踞經景廉派令總兵張玉春等馳往攻剿破壘直入賊眾敗竄追殺二十餘里復獲大捷其竄撲敦煌縣境之賊亦經官軍擊敗剿辦尙爲得手惟安敦玉一帶地廣兵單賊蹤飄忽異常難保不乘隙復來肆行焚掠必須擇要扼紮方足以遏賊氛景廉以敦煌地方較安玉爲完善擬卽帶隊親赴該處駐紮仍酌畱數營分紮安西以爲犄角所籌尙妥著卽將安玉挽運事宜布置就緒卽行馳赴敦煌以資鎮撫毋任該逆往來自如致地方復遭蹂躪也將此由五

百里諭令知之○甲申 上詣 大高殿祈雪○乙酉諭軍機大臣等金順奏官軍剿匪疊勝葭境肅清見仍帶隊出邊請撥馬隊以資追剿一摺竄葭逆匪經遊擊李考祥等在關山峁地方擊敗大股屯踞張家坪官軍從旁衝擊遊擊劉崇慶等復帶隊擁上斃賊甚多追殺至小川溝口葭境肅清其邊外回匪見擾扎薩旗之宮堡金順仍督馬隊及英中等營前往並令李考祥出邊隨剿著卽乘此聲威併力追剿以殄賊氛惟榆林高家堡一帶近有賊蹤是該逆意圖回竄神府續行東犯不可不早爲之防目下河水凝結山右河保等處在在堪虞鄭敦謹務飭在防將士晝夜梭巡毋令賊騎偷越張曜已入晉境並著飭令該提督整隊趨行前赴榆林以資厚集逆蹤飄忽靡常歸綏各邊防守尤關緊要著定安等分飭各將領勒加偵探扼要嚴防不准稍涉疏懈神木府谷等處

究屬空虛左宗棠當會同劉典等嚴飭在事文武相機掩擊毋任賊股東趨日形延蔓金順所部馬隊本屬無多且往來疲乏勦辦實覺不敷察哈爾前次備調馬隊五百名著文盛即在此項內酌撥二三百名選派得力將弁管帶馳赴金順軍營隨同攻勦不得以疲羸應數此起馬隊口糧卽著鄭敦謹按月籌款解支金順給發俾資飽騰秦之榆林無警卽晉之邊境獲安該署撫務須源源接濟毋視爲尋常協撥之款藉詞推延宋慶計已自豫起程著李鶴年迅飭該提督趕緊赴汾駐紮以壯聲援金順得此次所撥馬隊兵力較厚著卽會合張曜一軍四面兜勦迅竟全功將此由六百里各諭令知之○丙戌 上臨故鍾郡王第賜奠○諭軍機大臣等昨因金順奏葭境肅清邊外回匪肆擾誠恐河冰凝結山右河保等處在在堪虞當經諭令該統兵大臣等檄飭各軍分投防

勦見據金順奏由邊外馳回榆林探悉小川溝竄賊盤踞海會寺馬湖峪一帶嚮水堡迤南復有大股屯踞邊外蒙地一片沙漠無險可扼金順所部兵力甚單若不會合馬步各軍亟圖防範設該匪乘虛東竄必致防不勝防著鄭敦謹遵奉前旨檄飭張曜星馳赴榆以厚兵力李鶴年迅飭朱慶統帶所部趕緊赴汾州駐紮以壯聲援並著文盛遵奉前諭將備調馬隊官兵內迅撥二三百名派員管帶馳赴金順軍營隨同攻勦毋稍遲延各軍未到以前金順務當就現有兵力實力防勦左宗棠庫克吉泰劉典等迅卽嚴飭在事文武相機勦辦先東北而後西南毋任賊股東趨更成不了之局金順駐兵榆林與甯夏花定相距較遠不能兼顧設同匪勾結西竄則該處亦甚可虞著豐紳先事密籌防範以免疏失鄭敦謹劉典撥定協餉暨河東道應解甯夏之餉卽著按月如數批

解金順行營以資勻撥毋稍延欠蒙兵截剿竄匪因軍寡不敵以致東犯逼近河干扎薩克台相距薩托包頭鎮均不過三百餘里該處情形均形喫緊冰橋凝結何堪一誤再誤見在定安等已飭達爾濟等督隊分路防剿大同鎮官兵亦已到防綏遠右衛官兵交馬陞調遣往薩清一帶扼紮卽著定安桂成杜嘎爾等責成各路防軍沿河實力堵剿遇賊卽擊毋得稍涉鬆懈致干重咎殺虎口監督所撥稅課銀二萬兩著定安等咨催迎提以期妥速察哈爾暨晉省沿河一帶及宣化地方著文盛鄭敦謹官文一體認真嚴防定安等前請戶部籌撥銀十萬兩見在河防喫緊餉項缺乏著戶部迅速撥銀十萬兩以應急需將此由六百里各諭令知之○以江蘇徐州擒獲匪首高歸子縣丞曹式宗等升敘有差○丁亥諭內閣朕奉 慈安皇太后 慈禧皇太后懿旨前因鍾郡王

薨逝並無子嗣當卽諭令惇親王恭親王醇郡王孚郡王往見鍾郡王福晉問其於近支中願以何人爲嗣據實指出以便奏明辦理本日據惇親王恭親王醇郡王孚郡王面奏鍾郡王福晉請以恭親王之次子不入八分鎮國公載瀅承繼等語著照鍾郡王福晉所請將載瀅給與鍾郡王爲嗣載瀅著卽照例承襲貝勒百日孝滿後不必帶領引見並加恩支食半俸所有應行事宜該衙門察例具奏○諭朕叔鍾郡王素承優眷恩禮疊加昨日朕親臨賜奠篤念懿親彌深悲惋鍾郡王福晉著加恩賞給郡王半俸以資養贍○諭李鶴年奏帶兵大員縱勇殃民請飭查辦一摺甘肅涼州鎮總兵周盛波上年帶勇在河南南陽一帶追剿捻匪縱令所部馬隊駛至唐縣所屬之少拜寺砦搶殺難民輒因砦民開礮抵抗復縱勇逞兇槍斃團丁多名破砦而入肆行殺掠以致民人婦

女受傷身死及畏辱自盡者百數十人實屬藐法已極周盛波著
先行革職並著李鴻章將該總兵從嚴參辦不得稍涉寬縱一面
責令將滋事弁勇按名交出從重懲辦以肅軍律○諭軍機大臣
等福濟錫綸奏憑陳布倫托海情形一摺布倫托海勘建新城皆
係李雲麟偏執已見冒昧從事以致無事之地橫生枝節實屬乖
謬已極福濟等體察該處情形宜靜不宜動宜虛不宜實並深悉
其受病之由辦理必有把握自應及早另籌良策力革前非著卽
將叛民趕緊戡定悉心相度機宜妥籌辦法務使各處流民及各
屬部落均安生業免致復起事端以靖邊疆而副委任將此由五
百里各諭令知之○戊子諭軍機大臣等曾璧光奏川黔各軍攻
克麻哈州城一摺賊踞貴州麻哈州城經曾璧光派兵會同川師
剿撫兼施當將州城克復與崇實等前奏大略相同見在署提督

張文德力疾親督諸軍進紮王都保並分軍規復都勻著曾璧光傳諭該署提督乘此聲威鼓行而進並著崇實吳棠飭令道員唐炯聯絡黔軍進規清平舊州節節進剿務將都勻踞逆一律殲除併力下游以期肅清黔境將此由五百里各諭令知之○同逆竄榆林河防戒嚴諭定安等相機截剿○己丑諭軍機大臣等直隸提督劉銘傳所部勇丁向稱得力捻逆蕩平後該軍移紮山東張秋鎮休息已有時日昨據定安奏回匪竄擾扎薩克烏紳貝子旗等處歸綏情形喫重山西大同直隸宣化一帶亟應嚴防著曾國藩李鴻章傳知劉銘傳卽行來京陛見迅赴本任以重職守其駐紮張秋勇隊並令派委得力之員實力整頓聽候調遣將此由六百里各諭令知之○庚寅撥吉林黑龍江等處馬隊赴定安軍營○辛卯諭內閣宗人府奏應給貝勒官員甲數請旨遵行一摺鍾

郡王之承繼子載澄已封爲貝勒其應有官員甲數著卽照貝勒分內應得之數給與○諭軍機大臣等李鴻章奏分別遣撤畱防各軍一指李鴻章抵德州後陸續將所部兵勇遣撤共五十營至江南省城復與曾國藩等商定以淮勇未可盡撤酌畱銘鼎兩軍分駐河北濟甯一帶其江蘇徐州及沿江要隘則以吳長慶勇隊及勦字營分防劉玉龍礮隊仍紮江南下關江口而畱湘勇三營駐紮城內所籌均屬周密李鴻章以湖北爲四戰之地游匪防勇尙多擬帶郭松林等裁贖各營前往藉資鎮攝如江皖稍有蠢動仍可調回策應自係老謀深算且沿江一帶難保無游勇滋事亦可以資彈壓卽著照所請行以上畱防各軍馬新貽丁日昌均當相度機宜隨時酌量調遣務令地方安戢永絕亂萌各營本食蘇餉自應仍由蘇省供支著馬新貽丁日昌分別籌解源源接濟毋

令缺乏俟善後事宜大定再由李鴻章等酌度情形次第裁撤以節餉需至潘鼎新前已有旨令赴左宗棠軍營旋准該藩司所請給予假期統帶舊部回皖再挑募勇丁四千赴陝是該藩司所部未能扼紮濟甯應如何酌撥餉稍另籌布置之處著李鴻章會商丁寶楨妥爲辦理前諭李鴻章等飭令劉銘傳來京陛見迅赴本任該軍見有劉盛藻統帶駐防張秋卽著李鴻章遵照前旨催令該提督剋期起程毋再延緩李鴻章另片奏請假埽墓省親等語李鴻章爲國宣勤身在行間十有餘載今幸軍務平定自應俯如所請以遂孝思著賞假一箇月回籍惟兩湖地方緊要亟須該督前往控制一俟假滿迅卽起程赴任以重職守將此由五百里各諭令知之○壬辰御史游百川請除吏胥積弊從之○癸巳延煦等奏籌邊外墾地章程命都興阿覆覈以聞○甲午諭內閣前因

毛昶熙奏軍務漸平請飭裁減釐金當經降旨諭令各該督撫體察情形酌留大宗撤去分局零星雜販概免抽釐以紓民力茲據郭柏蔭何璟奏稱湖北見存各營需餉尙多並有積欠舊餉及籌辦善後各事宜見在酌留局卡八十六處擬裁分局分卡五十四處其餘偏僻集場各局卡概行裁撤等語卽著照所擬將暫留局卡慎選妥實可靠人員認真經理以歸覈實其裁撤各局卡如有私收等弊卽行從嚴參辦毋稍徇隱此外抽釐省分各該督撫等務當懷遵前旨體察情形分別裁留迅速具奏○乙未諭內閣鍾郡王於本月二十六日奉移暫安處著派恭親王於是日前往府中奠醑並派醇郡王送至暫安處再行祭奠○甘肅回逆竄扎薩克旗諭文盛派兵嚴防○丙申諭內閣前據侍郎胡璧智呈進前任安徽潁州府教授夏忻恭繹 聖諭十六條附律易解一卷暨

所撰檀弓辨誣三卷述朱質疑十六卷當交南書房翰林閱看據稱該員所輯附律易解尙得周官與民讀禮遺意用於講約甚有裨益其檀弓辨誣述朱質疑二書亦均能有所發明該員年屆耄耋篤學不倦甚屬可嘉卽著武英殿將該員所繕聖諭十六條附律易解刊刻頒發其檀弓辨誣述朱質疑兩書均著畱覽○諭軍機大臣等陝省餉項前部議令湖南將捐項四成歸陝甘兩省分用嗣又准劉典所請諭令郭柏蔭何璟將湖北分收湖南銷售淮鹽釐金全數解陝原以陝餉支絀藉此資其飽騰茲據劉典奏稱屢次催提並未分釐解到該省軍事方殷見又收撫扈彰一股籌給口食並安插經費無款撥發自係實情且湖南係屬完善之區捐輸各款尙易爲力劉峴白應統籌全局彼此兼顧所有前經部議分成捐輸銀兩著卽按照成數隨時分解並就近催令道員

易濶壇將准撥湖北分收淮鹽釐金全數起解毋再藉詞推延致
陝軍日形匱乏劉典卽酌量派員迎提到營以資應用將此由五
百里各諭令知之○丁酉諭軍機大臣等毛昶熙奏請調宿將駐
紮畿北一摺前因歸綏防務喫重宣大一帶亟應嚴防曾降旨令
曾國藩李鴻章傳知劉銘傳迅卽來京陛見其駐紮張秋勇隊整
頓候調見在歸綏防務仍未見鬆宣大爲畿疆屏蔽亟宜大員督
率辦防劉銘傳著卽兼程來京陛見儻該提督尙在江甯卽著馬
新貽就近傳知如已回本籍並著李鴻章吳坤修傳知以期迅速
宋慶一軍前令馳赴汾州扼紮該處情形較鬆宋慶曾否自豫起
程卽著李鶴年鄭敦謹飭令該提督統率所部徑赴歸綏協同防
剿並著定安等督率所部聯絡聲勢以資得力所需餉糧軍火著
李鶴年鄭敦謹寬爲籌備毋令缺乏致有貽誤將此由六百里諭

知曾國藩李鴻章定安馬新貽鄭敦謹李鶴年並傳諭吳坤修知之○山西平定州會匪滋事命鄭敦謹等嚴緝○戊戌廣湖南鳳凰廳學額三名安徽廬江縣二名江蘇吳江一名○己亥諭軍機大臣等曾璧光奏官軍攻克都勻府城一摺貴州官軍自克復麻哈州城後進規都勻逆首楊開輜等分率苗黨踞守關隘阻我進兵之路提督張文德親督各軍於十月間進取王都保賊巢逆首潘名榮等率眾投降徑道關之賊集黨死守旋經官軍攻破並進拔文得關殺賊五百餘名乘勝直薄都勻分門環攻十三日夜間官軍一擁登城短兵相接斃賊一千餘名餘賊奪門四潰復追殺數百名當將都勻府城克復剿辦尙屬得手仍著督飭官軍將毛坡賊巢剋期掃蕩迅殄逆氛提督張文德力疾督軍克拔堅城奮勇可嘉著賞穿黃馬褂並賞換達桑阿巴圖魯名號○諭定安桂

成奏沿河沿邊一帶道路及扼要處所繪圖呈覽並截剿賊匪情形各摺片賊黨馬繫禁等三四人見在準噶爾旗南界古城哈喇寨及迪西拉拜山等處盤踞該處路徑崎嶇扎那格爾第達爾濟以兵力過單未便深入卽在沁扎木召地方扼紮距賊尙有百餘里此時河水凝結難保該逆不乘隙東竄定安桂成務當飭令該貝子等督率所部嚴密防範勤加偵探遇有賊蹤竄近卽行奮力截剿毋任擾及河干並令杜嘎爾馬陞督帶官兵認真梭巡毋稍大意前調神機營馬步各隊及天津洋槍隊均已陸續起程俟此項官兵到後兵力較厚卽著定安桂成相機調度飭令會合杜嘎爾所帶之兵探明賊蹤過河進剿掃蕩逆氛將此由五百里各諭令知之○諭穆圖善奏官軍攻克新路坡等處見在進剿情形一摺河州逆匪久踞新路坡經穆圖善督軍攻拔乘勝收復泰子

寺汛城並躡平祁家集逆巢辦理尙爲得手河州悍賊俱在大東鄉而三甲集爲大東鄉咽喉必須將該處攻克方能次第掃蕩著穆圖善檄飭各軍穩紮穩進將三甲集回匪剋日殲除以期節節進剿廓清河州全境甘省兵食久罄各營刈草爲羹藉資果腹困苦情形殊堪矜憫著左宗棠懍遵九月十八日諭旨將甘餉源源分撥以濟飢軍傅先宗前已補授涼州鎮總兵該員見在請假回籍著穆圖善催令迅赴新任以重職守傅先宗簡放是缺能否勝任並著穆圖善查明覆奏將此由六百里各諭令知之○諭曾璧光奏攻克都勻府城並請畱楚軍各摺片逆首楊開幗久踞都勻府城經張文德督軍攻拔餘賊奔踞毛坡亟應迅速掃蕩方免孤軍深入之虞且逆首潛逃尤應趕緊捕拏以除巨慝著曾璧光仍飭張文德等迅將毛坡賊巢一律攻毀殲擒首逆毋任久稽顯戮

清台苗逆分擾銅仁石阡印江及麻陽晃州等境楚黔邊防喫緊彭芝亮一軍駐紮思南尙形單薄若再撤回楚省則該處更形空虛設苗逆橫出思南脅降肆擾緩急復何所恃著劉崐仍令彭芝亮一軍畱駐思南毋庸撤回楚省席寶田假期已滿並著該撫催令該臬司懷遵疊次諭旨督率所部由黔省下游取道前進毋再稽延將此由五百里各諭令知之○庚子諭軍機大臣等蘇廷魁李鶴年奏榮工兩壩埽占情形並防護凌汛各摺片榮工口門自本月初八日溜勢卽走中泓東西兩壩埽占情形均見輕緩趁此事機順利著該署河督等督飭在工員弁趕購料物無分晝夜竭力興辦以期年內合龍見在河水雖未瀟凌但一經風雪卽轉泛寒冰凌不可不防並著該署河督等飭屬妥慎防護力保無虞毋稍大意將此由五百里各諭令知之○左宗棠奏陝西西北兩路

剿賊獲勝十月十五日以前戰事業經馳報所有署綏德州知州成定康十月初一日大破田莊鎮僻家寨回土各匪已據其緘報馳陳嗣接成定康續稟詳細情形初六日土匪頭目李雙良瞰延榆綏鎮總兵劉厚基將赴綏德妄圖截取輜重襲攻劉厚基畱駐田莊之提督王雲孚營壘初七日大股回土各匪擁擁倏至王雲孚出隊攻擊眾寡不敵爲賊所敗憑壘固守賊眾數萬肉薄壘外併力環攻一晝夜不退王雲孚誓死拒守槍矛殪賊甚多而弁丁傷亡者已數十計遣人於薄暮由賊中穿出赴綏德求援成定康聞警傳令飽食出隊卽夜三鼓親率所部及都司殷忠廷由華家灣進飭喻先恕戴光明由于柏灣進約銜枚疾走度行近田莊見火箭上射卽併力猛進卻者斬將近五鼓距田莊約四五里聞槍礮聲緊知賊攻壘甚急火箭上射兩路並進又二里山右斜徑旁

通飭殷忠廷設伏谷口防鈔尾之賊成定康所部與左路衝殺而
出賊見援軍偏近果分股自斜徑鈔來殷忠廷扼之斃賊數十名
騎賊先敗成定康及喻先恕戴光明兩路奮威衝殺天明劉厚基
所遣援軍遊擊李萬盛亦至王雲孚見援軍四集率所部從壘中
躍出各營併力環擊銳氣百倍追殺二十餘里斃賊二千餘名奪
獲馬匹旗械無算自此痛剿之後殺德州附近六七十里地方已
無賊蹤其雙湖峪三皇苑老巢之賊移踞周家鼓李家河兩處時
分股竄擾清澗米脂縣境十月二十六七等日成定康率各部營
進駐綏德吳堡交壤之義合鎮賊望風而竄成定康以米脂清澗
尚有賊出沒州城未可解嚴仍卽收隊回州二十九日署吳堡縣
知縣呂懋勛報有馬步賊眾數千回竄縣屬霍家溝應牛寨兩寨
旋被攻陷成定康適患寒疾立飭福建候補同知陳瑞芝率各營

由義合鎮進剿十一月初一夜師抵應牛溝殷忠廷突襲寨後斬關而入斬賊數十級賊倉皇出走寨外各營挺矛攢刺斃賊極多初二日黎明乘勝進圍霍家溝寨亦一鼓而下其詳細情形尙未據稟報惟同時清澗縣亦有賊攻撲成定康之軍仍須返旆而南急援清澗此綏德一軍連獲大勝實在情形也其延安東北一帶時有甘肅土匪竄擾十月十二日記名總兵劉厚基幫帶刑部主事周瑞松調知賊圍攻劉家寨甚急是日由府城拔隊行八十里抵何家寨卽夜五鼓潛師急進行至距劉家寨五里溝口遇賊奪其瞭望大旗殺賊三名行里許有賊二三百列隊川口官軍大呼衝入斬數十級生擒匪黨呂興幅等七名餘皆紛潰劉家寨之危遂解乘勝整隊前進行過一山騎賊五六百飛奔迎戰副將黃超羣陳振贊等躍馬陷陣立斬賊目一名而奪其馬訊據生擒賊供

知騎馬賊目係營官李霸四川潰卒也羣賊喪膽鼠竄官軍長驅疾追前途遇賊六七千劉厚基飭礮隊分起轟擊斃騎賊五名賊皆奔潰復整隊壓之羣賊因山險路仄擠墮崖落澗者不計其數日暮收隊計共陣斬三千餘名生擒數十名餘賊遁回定邊縣新城老巢劉厚基等以距延安甚遠收隊回郡此延安一軍擊賊獲勝之情形也甘泉鄜州地居陝西北路之中爲董志原回逆東西奔竄衝要記名提督劉端冕率所部駐鄜派副將喻先知率後營填紮甘泉以資扼截十月三十日探報甘泉屬之高家哨靈溝各有由董志原出竄之賊約六七千人突至圖撲城垣二鼓賊至喻先知率弁勇憑城以待昏夜槍礮轟擊賊知有備卽時引還黎明輕騎復至喻先知出城迎擊斃賊數十名賊仍卻退而遠望塵氛大起知後有大股麇至一面收隊回城一面馳告劉端冕迅速赴

援初一夜羣賊復至城下呼噪攻撲畱陝副將喻經魁副將黎思齊周茂林及各弁勇植立垛口開槍礮轟擊斃賊不知多少其悍賊冒死攀梯及頭頂板片登城者甫及垛口輒經官軍揮刃砍下賊氣益沮然猶在近城窺伺未遽退也黎明城南角聲隱隱頃刻劉端冕率馬部大隊夾河馳至城上歡聲雷動劉端冕知賊猶未遁卽傳令管帶前營畱陝知縣邵杜上太和山趨左路自率中營趨右路鼓聲大起整隊猛進賊駭而退奔喻先知開城出隊復從北路截之三路併力窮追至高家哨乃令收隊計是役共斃賊七八百名生擒王虎兒等二十一名軍前正法餘賊分竄洛川白水澄城地界適道員魏光燾遵前檄率所部由鄜州進王家角行至蒲城尋蹤掩擊臣宗棠亦飭提督蔡光武帶卓勝馬步全軍由韓城出宜川截其乘永東竄之路而與魏光燾收夾攻之功賊知大

軍四集遽從澄城雷原鎮遁去此甘泉殺賊解圍實在情形也其
另股回逆同時竄犯邠州麟游蔓及汧隴署隴州知州喻兆奎稟
十一月初四日已刻州西之亭口一帶突來騎賊數百直衝至大
佛寺里許之七里灣道員黃鼎所部新捷營迎勦鏖戰良久擬保
千總張吉珍陣亡弁勇傷亡數名遊擊何占元馳往策應賊欺官
軍甚單直前搏戰正相搏間適存城各營隊伍踵至賊卽由南原
竄去黃鼎飭副後營及馬隊躡蹤緊追初八日抵拜河賊方攻太
白堡見官軍掩至卽解圍竄走初九日追至雷堡則賊已由亭口
竄去矣其竄擾汧陽者甘肅臬司張岳齡飭參將胡弼武擊之初
九日遇賊黃嵩灣伏兵突出首先刺斃紅衣賊目一名落馬胡弼
武率隊急擊斃賊多名追至邱家莊收隊此邠州汧陽擊賊獲勝
之情形也竊維陝西兵事東北延榆綏一帶土匪董幅祥李登等

股及甘回蘇阿渾等不時竄擾近日賊蹤偏注米脂葭州迤北神木府谷地界西南自鄜州以至邠鳳陝回不時竄擾而甘回亦有時附入其中賊蹤雖蔓延千數百里人數尙多至二十餘萬然屢敗之餘勢均衰蹙如山西能扼其東趨甘肅能扼其西竄則秦軍分投剿辦亦無難就地殲除所慮各省兵力難齊賊匪乘虛輒入將有防不勝防剿不勝剿者臣等謹就目前籌畫情形分別陳之秦之東北所恃黃河天險與晉共之今歲冰橋凝結較早晉軍備多力分誠恐百密一疏貽誤大局諭旨飭張曜由河曲保德渡河以入榆林宋慶由豫渡河入晉扼汾州晉之西防固已嚴密計張曜此時可以馳抵河保矣惟宋慶尙無入晉之期臣宗棠前檄劉松山馬步全軍由陝州茅津渡河入晉徑赴汾州乘冰渡河入陝據劉松山呈報十二日全軍始克渡畢計此時可抵平陽一帶其

到汾州在宋慶之前擬飛檄劉松山到汾後於河之西岸擇地駐紮廣購軍糧一面探聽北路一帶軍情自酌進止如河保迤南晉防穩固則乘冰橋赴綏德榆林進剿否則北向以赴戎機此軍以固晉爲主不必以赴陝爲急其宋慶之軍可由太原北趨甯武朔平一帶爲歸綏後勁如歸綏有警亦可就近赴之汾防既有劉松山兼顧則宋慶似可無庸駐汾應請飭下山西撫臣傳諭宋慶酌量辦理以期均布周妥其陝回十八營踞董志原爲老巢食竭力殫四出剽掠其求撫也每以無糧爲詞而於如何安插永遠不侵不叛一切事宜未能據實傾吐各路探稟回眾有北竄金積堡西竄甘肅之議近亦有移眷口入平涼者臣等前摺所籌布置情形原爲偏巢會剿起見見正籌商安營遞運軍糧然後併力前進方爲穩慎秦中用兵之難迥異他方者以此大致以杜其北竄爲要

不能保其必不北竄也 上諭綏德延安等處土回各匪疊經成
定康劉厚填各軍勦擊殲斃甚多賊勢漸已衰蹙左宗棠檄令劉
松山一軍由陝州茅津渡河入晉徑赴汾州並以宋慶一軍北趨
甯朔爲歸綏後勁所籌甚是著卽飭令劉松山於到汾後擇地駐
紮先固晉防並探聽軍情自酌進止張曜不久卽抵榆林自可與
金順會商戰事惟黃河水橋早結秦之東北空虛仍應力籌兼顧
扼賊東趨著左宗棠庫克吉泰劉典迅飭劉端冕等分投追擊痛
殄逆勢使不得乘機北竄其踞葦志原之陝回食竭求撫能否就
地安插並著該大臣等隨時酌辦沿河賊匪分竄永甯大甯等處
雖經晉軍擊回難保不乘隙偷渡仍著鄭敦謹督率在防將士及
沿河各地方文武於河水未泮之前晝夜梭巡見賊卽獲不准稍
有疏虞宋慶見已由豫起程該軍行抵晉境時該署撫當懷遵前

旨卽令該提督統率所部徑赴歸綏以資厚集郭寶昌軍需餉方
殷未便任其久待鄭敦謹仍飭該藩司按月籌撥不必以蘇餉抵
解致有缺乏歸綏地方緊要定安等當就見有兵力妥爲堵禦一
面咨令馬陞加意嚴防俟神機營所撥各隊到綏卽會同杜嘎爾
相機進擊用靖邊陲將此由六百里各諭令知之○諭英桂卞寶
第奏臺灣領事官縱令洋將違約妄爲請飭總理衙門辦理一摺
臺灣領事官吉必勳於議結之案忽然翻約縱令嚇囑開礮擄船
占踞營署偪死副將大員殺傷兵勇焚燒軍火局庫索取兵費種
種違約實屬有心構釁豈能稍事姑容已諭令總理各國事務衙
門知會英國公使辦理矣臺灣物阜而民雜近年各國通商易於
啟釁英桂卞寶第務擇爲守兼優通達事體之鎮道大員前往遇
事剛柔互用按約辦理並整頓營制吏治以肅官方不可稍涉大

意未結各案卽著飭令曾憲德等迅速辦結將此由五百里各諭令知之○于臺灣被戕副將江國珍祭葬世職○壬寅諭軍機大臣等麒慶奏軍務告成一摺盜首任義潰及著名匪徒殲除殆盡惟彌勒僧格在逃未獲該犯稔惡多年豈得任令遠颺久稽顯戮且此犯一日不除必致死灰復然貽患將來著都興阿額勒和布恩錫富明阿麒慶嚴飭各該地方文武員弁勤加躡探認真捕拏務獲以絕根株儻因兵勇旣撤漸生懈心致令要犯漏網恐該將軍等不能當此重咎也將此各諭令知之○癸卯 上詣 大高殿祈雪○于甘肅陣亡知縣倪之經祭葬世職○是月蠲免吉林雙城堡被雹被水屯田本年租賦倉穀獨緩直隸開州等三州縣被水新舊額賦暨民借倉穀山東濟甯等六十一州縣德州五衛東平所屯莊禾阜等三場被水被旱被蟲被雹新舊額賦倉穀雜

課緩徵兩淮富安等十四場歉收新舊錢糧

十二月甲辰朔諭內閣崇實吳棠奏官軍攻剿西昌交脚夷巢疊勝招撫大小部落乘勝進剿一摺四川西昌縣之交腳汛爲猓夷來往通衢其間部落如林而竹黑大木桿哱牛壩等處尤爲強悍句眾擄掠民間被害甚慘八月間經提督周達武總兵李有恆等四面雕剿先後將竹黑大木桿夷堡一律平毀官軍進紮哱牛壩後山十月十七十九等日疊敗賊於婁落赤碧璣等處約姑落各踞匪堅壁不出官軍分路設伏進攻陣斃逆匪多名賊股同時擊退竹黑大小夷部悉詣軍營求撫剿辦尙爲得手著崇實吳棠飭令周達武等乘勝進攻節節掃蕩一面將哱牛壩遁匪拔除淨盡並檄飭地方文武各官妥籌善後以靖邊陲○諭軍機大臣等劉崐奏湘軍攻克貴州天柱縣城見籌進剿情形一摺逆目陳大六

等占踞天柱縣屬之江口聖陷沒縣城句通苗逆推巨逆李恆吉爲首久爲黔楚之害經劉岷飭席寶田督軍分道進攻先將援賊之悍苗九大白等股擊退攻入江口聖逆寨擒斬甚多巨逆李恆吉等死於軍中逆目陳大六等均經就獲並將縣城收復勦辦尙爲奮勉卽著劉岷飭令席寶田等務將餘匪搜捕淨盡所有天柱縣善後事宜妥爲部署卽督軍掃蕩附近苗寨東通鎮遠西達清仁期與川軍會合其分擾石阡銅仁等處之苗匪並著劉岷嚴飭彭芝亮羅孝連黃潤昌迅速殄滅毋任蔓延古州逆目楊志汰等窺伺黎平劉岷已飭戈鑒等募勇兩營進剿該處毗連粵西著蘇鳳文迅選得力兵勇三四千人派員帶赴黔粵交界地方與湘黔各軍會攻以收夾擊之效毋稍玩誤將此由五百里各諭令知之○命直隸等省撥解東三省餉需○予陣亡遊擊吳誠富等祭葬

世職○予四川陣亡知府楊秉琮祭葬世職建祠副將董瑞麟等祭葬世職附祀○丙午諭軍機大臣等定安等奏賊匪竄近河干各隊防剿情形一摺賊匪分撲包頭鎮昭君墳大股在十里長灘等處官軍分路進剿達爾濟所部小有失利亟應速籌守禦扼賊竄擾東北之路著定安桂成檄飭達爾濟等軍防剿兼施將偏近河干之匪節節掃蕩悉數殄除以期次第廓清喇嘛灣對岸已見邊馬托城防務喫緊該將軍見調駐紮薩拉齊之綏遠步隊一千名分防包頭托城卽著定安等就見有兵力相機布置嚴密防守並著左宗棠督飭北路官軍覘賊所向認真截擊毋令續竄邊外致匪勢益肆蔓延鄭敦謹務當嚴檄沿河兵勇實力堵禦不可稍有疏虞宋慶見在行抵何處著鄭敦謹李鶴年催令該提督懷遵疊次諭旨星夜遄行徑赴歸綏以厚兵力神機營所撥各隊及天

津洋槍隊業經起程著神機營王大臣催令該官兵兼程前進迅速赴防協剿毋稍遲滯致誤戎機計黑龍江吉林等處官兵刻下可抵殺虎口一帶如托清等處軍情緊急定安當飭就近徑赴該處防剿以免周折薩拉齊包頭爲賊匪所垂涎聲東擊西是其故技應如何嚴密布置之處定安等當加意防範毋稍疏忽將此由六百里各諭令知之○倉場侍郎衍秀畢道遠議覆整頓倉務章程從之○飭各省豫撥來年京餉○丁未諭軍機大臣等麒慶奏擒獲要犯保奏出力人員各摺片彌勒僧格一犯結黨肆擾罪大惡極屢次被獲脫逃尤爲兇狡見在既經擒獲訊明確實若再羈禁待質儻致痠斃囹圄轉得倖逃顯戮著麒慶接奉此旨後卽將該犯明正典刑以彰國法毋稍稽延將此諭令知之○諭福濟錫綸奏見存滿兵請改地安插一摺伊犁巴燕岱烏魯木齊古城吐

魯番各城駐防滿兵自回逆倡亂以後遷徙流亡所餘僅一百五十人鋒鏑餘生殊堪矜憫若畱於西路征剿亦不成一隊自應照福濟等所請改地安置卽著於綏遠城熱河張家口三處分別安插毋庸改隸京旗福濟等卽按定人數妥籌資遣分隸各處仍照該官兵等原有職任錢糧坐補以示體恤此項官兵到時定安麒慶文盛仍責令照常操演毋令游手好閒坐耗餉糈布倫托海剿匪應需兵力著福濟錫綸妥商籌辦毋稍貽誤將此各諭令知之○飭山西解烏科兩城經費○己酉予福建被妝巡檢曹本祭葬世職○庚戌諭軍機大臣等前據英桂等奏臺灣洋人違約妄爲等情當經諭令總理各國事務衙門知會英國使臣辦理茲據奏稱臺灣樟腦一案屢經咨行該督撫早爲辦結免致藉端生釁乃遷延日久致有開礮擄船殺傷兵勇之事見經該衙門將領事等

逞兇違約情形照會該國使臣令其從嚴懲辦尙未接有照覆惟該督撫前奏臺灣焚燒教堂並華洋交毆謀死教徒各案已結五起未結二起及吉必勦覆文一切情形未據咨報總理衙門無憑辦理中外交涉事件必須彼此隨時知照方免舛誤豈可稍涉遲延著英桂卞寶第卽將辦理已未結教案起釁情由及與該領事面議各節並來往文件趕緊詳細咨報該衙門覈辦並將此案始末情形據實咨報不得稍有回護粉飾致滋口實將此由五百里各諭令知之○壬子諭軍機大臣等金順奏賊眾東趨督兵勦辦一摺邊外回匪東趨麻地溝哈喇寨一帶金順聞信後卽帶兵東趨府谷先據渡口視賊所在截其竄渡所籌甚合機宜見在榆林既有總兵劉厚基一軍張曜之軍計日亦可趕到則郡城不至空虛金順已赴府谷自當一意勦截東竄之賊以免顧此失彼卽著

該副都統會同張曜督飭官軍實力防剿毋令該逆得以東渡如
邊內兵力已厚或繞至清托一帶與歸綏各軍聯絡聲勢合力堵
剿仍著該副都統體察情形斟酌辦理協領富勒琿記名副都統
托克屯前據都興阿保奏曾降旨飭令來京見該二員在金順軍
營辦理糧臺等事儻可派員接替卽著飭令來京聽候諭旨將此
由六百里各諭令知之○予福建陣亡員外郎祝德醇祭葬世職
並陣亡總兵官林向榮浙江陣亡知縣楊庭欽等建祠○癸丑諭
內閣翰林院侍讀鐵祺奏請開墾南苑一摺所奏實爲紕繆南苑
爲我朝肄武之地 列聖疊降諭旨禁止私墾 聖訓昭垂豈宜
稍改舊制朕御極之初升任通政司副使劉有銘陳請開墾當經
管理奉宸苑王大臣會同戶部查勘以其事乖舊制曾降旨斥駁
鐵祺職在論思豈未之知耶所請著不准行○左宗棠奏臣西征

實餉前蒙恩允部撥六成洋稅銀一百萬兩疊經催解僅准湖北
咨復飭江漢關撥解銀八萬兩交鄂設後路糧臺轉解閩浙督臣
借撥四成洋稅銀十萬兩浙海關五萬兩交上海轉運局匯解其
江海關之五十萬兩馬新貽函稱年內無款撥解此外則並無一
字見復統計西征實餉年內僅祇江漢關八萬兩到陝閩之十萬
浙之五萬雖定於十月二十五日在解州運城匯兌明正或可到
省餘均無望矣以戰事論回酋畏勦求撫其情甚迫頃據署綏德
州成定康稟土匪李登李雙良遞呈求撫其情亦迫劉松山又已
馳抵山西永甯州賊之畏勦本在意中復見大軍進逼就撫之心
益決臣與劉典擬并力圖之然言勦則必須儲芻粟籌轉運備行
糧言撫則必給口食籌安插開屯田兩者均非實餉到手通融挹
注隨機立應不可前蒙恩准撥河東鹽課二十萬兩四川鹽釐二

十萬兩臣懷遵諭旨以四川之二十萬兩撥歸甘肅以河東之二
十萬兩撥歸陝西彼此就近提取稍期近捷然臣與劉典各軍已
欠餉七八箇月未發雖河東鹽餉二十萬兩年內可以到齊而山
西照常應解郭寶昌一軍及臣軍月餉自八月至十一月四箇月
共計十四萬兩未解河東本欠慶陽雷正綰軍餉五萬兩未解是
奏提河東鹽餉二十萬除抵山西應解之陝餉河東應解之慶陽
協餉共十九萬僅得銀一萬兩那東掩西得此失彼於陝餉終無
實濟其奏提四川鹽釐二十萬兩甫准吳棠允撥三萬兩而陝甘
委員在蜀勸捐已發各縣之貢監從九部監執照五千餘張則已
經吳棠奏請歸併成都重慶兩局餘均飭令撤繳是甘肅得四川
見銀三萬兩失去捐餉二十餘萬兩也臣與劉典各軍月餉僅發
至本年五月及前四月止已積欠七八箇月而年內入餉僅止二

十八萬計尙不敷一月之放其勦撫之資更將何所指望乎陝甘窘迫之狀如此待用之繁且鉅如此而諭旨准撥之餉如此續奏山西四川之餉又如此臣計無復之一死曷足塞責不得不瀝陳哀籲於 君父之前萬一陝甘危局得以瓦全臣可稍延殘喘國家之福陝甘之幸亦臣之幸也儻陝甘將來或因無餉而致決裂臣無所逃罪而內外諸臣謀國之疏容有不能無遺議者伏念臣初次請撥西征實餉部臣以六成洋稅應夫豈不知各海關六成洋稅之早已提空也嗣請撥常年實餉四百萬兩部臣緩俟各省奏到之日始議劃撥夫豈不知各省釐稅千數百萬兩本爲國家同有之款各省可撥之款也臣原奏據陝西撫臣署陝甘督臣陳明短缺實餉四百餘萬兩其各省見協之款本不在內而部臣又誤將見協之餉歸併臣續請之四百萬兩計算夫豈不知陝甘常

年應撥之餉本不止四百萬兩也部臣爲肅清之各省籌應留之款獨不當爲陝甘籌應撥之款乎各省均專籌本省撤兵留兵之餉獨不當爲陝甘籌用兵之餉乎至於安徽撫臣英翰署撫臣吳坤修奏增郭寶昌馬步隊三千名合之該軍入陝者七千有奇不過藉西征之名以畱皖餉安插皖勇名爲協陝實則無益於陝西之兵事而有損於陝西之餉事又無論也應否請旨飭下部臣籌撥陝甘實餉飭各省督撫海關諸臣速撥陝甘實餉彼此至誠許與急救危疆之處出自宸衷獨斷臣之愚誠已盡於此軍機大臣奉旨戶部速議具奏○甲寅上詣大高殿祈雪○諭軍機大臣等前據曾國藩奏請禁川私入楚收復淮南引地以復舊制當交戶部議奏茲據該部遵議請旨辦理一摺淮南引地以楚岸爲大宗從前因江路梗阻淮鹽未能行銷疊經湖廣總督奏明借

撥川鹽並抽收川私釐稅原係一時權宜之計近年江路早經暢通自應規復舊制雖節經酌減淮釐以輕成本而鄰私未能盡禁淮鹽總難暢銷曾國藩所陳川私病淮各節自係實在情形著吳棠李鴻章郭柏蔭何璟卽將川鹽行楚章程妥籌停止其宜昌沙市等處應如何撤局停稅並稽查偷越之處著李鴻章郭柏蔭何璟飭屬妥辦並將裁停川稅日期截清報部毋滋弊混至曾國藩所稱淮鹽並收鄂釐淮銷果暢鄂餉卽可加增將來所收鄂釐較之川稅收數能否不至大相懸殊著李鴻章等體察情形具奏惟川鹽行楚旣久井竈增多見在旣經禁銷自應酌量封禁並著吳棠妥爲籌辦其如何分限減停及堵緝各路鄰私著馬新貽覈議章程奏明辦理自此次改復舊章之後務當嚴禁商人夾帶並飭垣商講求煎煉其到岸候輪之鹽不准私自擡價該督撫等總當

不分畛域實力妥籌以絕弊竇而維大局至湖南郴桂等處抽收
粵鹽釐稅著劉崐查明奏請一併停收禁止粵私入楚以歸畫一
其兩淮應用行鹽引張並著兩江總督查明委員赴部請領不得
僅用鹽政大票以符舊例原摺均著鈔給閱看將此諭知李鴻章
馬新貽吳棠郭柏蔭劉崐並傳諭何璟知之○丙辰諭軍機大臣
等定安等奏連日擊退賊匪情形一摺回逆馬政和等股竄擾唐
蓋謨多等處經杜嘎爾馬陞督率包托兩路官兵分投奮擊賊均
敗退馬陞見已回包頭大營駐紮並於中灘昭君墳地方添兵防
守布置尙屬周密惟該逆等均在哈拉寨十里長灘一帶負隅踞
險難保不偷越冰橋自應迅籌截剿力遏賊氛著定安桂成仍商
同杜嘎爾督飭扎那格爾第達爾濟並檄飭馬陞均就見有兵力
於沿河地面扼要嚴防相機剿擊毋任該逆乘虛搶渡神機營所

撥各隊除吉林黑龍江兵已由定安派赴托城外其餘馬步各隊並天津所撥隊日內計可陸續抵綏定安等當卽咨令杜嘎爾督飭帶隊官會同在防將士確探賊蹤節節進剿以期早殄逆氛將此由五百里各諭令知之○丁巳諭內閣岑毓英奏官軍克復澂江府城各路剿匪獲勝一摺雲南澂江府城久爲回匪竄踞經岑毓英督派各軍進攻屢破逆壘多處直逼城下晝夜環攻復經馬如龍派員將援賊馬自新斬斃十月十四日官軍架梯登城殲斃逆首偽中郎將張鵬程殲賊一千餘名搜獲偽印偽札等件其派援武定之師復將沙浪果冬村等逆壘全行攻拔擒斬偽裕信大將軍沙映棠陣斬茶偽大將軍殲除逆黨多名攻剿邵甸之軍連破矣者村堡逆壘七座斃賊二百餘名生擒徐偽中郎將楊偽將軍正法剿辦均屬得手卽著岑毓英督飭各軍乘勝進剿肅

濟全境○諭軍機大臣等岑毓英奏官軍收復府城各路剿匪獲
勝各摺片徵江府城失陷賊燄日張岑毓英於克復呈貢後派令
何秀林等移兵進攻疊破逆壘張元林率眾乞降官軍仍加勁圍
擊乘勝入城殲斃逆首當將府城收復復飭何秀林等進攻嵩明
其沙浪果冬村矣耆村堡等處逆壘並經張保和黃文學李廷標
等攻拔擒斬僞將多名剿辦甚爲奮勉見在省城糧路較寬惟武
定邵甸一帶尙未肅清著岑毓英仍飭黃文學等相機渡河聯絡
諸軍規復武定一面飭令李廷標等攻剿邵甸毋稍鬆勁該撫見
同省城並著商同馬如龍督飭各將弁將附城賊營悉數掃蕩劉
嶽昭亦當嚴飭各軍迅取尋甸並會合岑毓英所派將士分路兜
剿以收夾擊之效已革守備張元林通賊獻城其罪本無可貸茲
據該撫奏稱隨同克復府城傷疾甚重著暫緩正法俟其立功後

再行請旨將此由六百里各諭令知之○戊午允馬新貽等請江蘇丹陽金壇溧陽三縣錢漕權辦折徵○己未左宗棠奏續據署綏德州知州成定康稟報官軍自連破應牛寨霍家溝生擒匪目張萬雲斬之匪回張登第乞降畱閩補用同知陳瑞芝受之十一月初八日成定康率所部進張家塢遙見匪眾千餘攻劉家寨甚急卽飭參將戴光明由右都司殷忠廷由左而自率親軍及總兵喻先恕由中路急進將近劉家寨賊騎數百由寨後小溝橫截而出突圍成定康及喻先恕先鋒親兵各隊成定康喻先恕皆下馬步戰親擎洋槍連環轟擊斃賊數名鏖戰數刻各哨勇丁飛奔而至槍礮齊施賊卽敗遁步賊奪路狂奔適戴光明由右路至截其去路羣賊回旗反撲成定康喻先恕麾所部截之寨民百餘亦持械追逐賊馳而左復與殷忠廷遇各路會集環攻頃刻賊屍填滿

坑坎僅一賊目同十餘騎衝出此股悉數就殲計共斃賊千餘獲馬騾五百餘匹訊據生賊供稱衝逸之賊卽頭目辛滿城曾約同賊目張萬飛由義合堡內竄尙未到也張萬飛聞辛滿城經官軍擊敗不敢內竄改由義合堡南竄出攻陷雷家寨雷家寨距州城七十里十一日辰刻成定康率師追之行抵薛家茆訶知賊已由雷家溝竄渡無定河盤踞峪口海座灣一帶正攻王家寨成定康飭陳瑞芝先赴河邊架造浮橋是夜五更潛師夜起十二日辰刻渡河進擊方半渡時賊騎數百蠶擁而至殷忠廷整隊迎擊酣戰數刻戴光明率隊踵至賊皆下馬挺矛格鬪成定康率所部由左路鈔出賊後號鼓齊鳴賊駭而奔官軍乘勢掩殺追過王家山賊復回拒鄧萬盛徐尙清督隊猛擊戴光明帶洋槍隊陷陣轟斃悍賊數十賊敗向張家台喻先恕殷忠廷率隊追至殷子溝邱家寨

一帶收隊計是役共斃賊數百名生擒百名奪獲騾馬三百餘匹
餘賊向清澗竄逸此成定康十一月初八十二等日痛剿高逆餘
黨張萬飛辛滿城獲勝實在情形也見據成定康稟二十六日進
剿清澗踞賊賊目李登李雙良辛滿城等畏剿乞撫臣等飭熟察
賊情及安插地方稟候核酌尙未接據續報其榆林一帶戰事已
由金順馳報矣董志原回逆屢經剿敗兇鋒大挫然因飢掠食蹤
迹靡常十一月十五日探報馬八禮率回土各匪二千餘竄至隴
州城西四十里之咸宜關運司銜陝西試用道喻步蓮卽於是夜
三鼓率副將劉寶元總兵譚羣魁副將龔曉亭由曹家灣進天明
抵咸宜鎮誦賊在黃家溝卽捲旗襲之殺賊三四百名生擒同逆
魯三元洪包連及土匪周七等十餘名奪獲騾馬百數十匹十九
夜提督周紅濂所部副將張大雄會剿竄擾中部縣屬之五家原

逆回斃悍回百餘騎其另股一竄西家溝一竄宜君屬之偏橋而大股則仍踞店頭二十日張大雄商同副將劉甫田李賓光各自防所率隊截之周紹濂得報卽夜飭總兵董玉春扼隆坊一面料理中部城防親率所部及參將毛正明於是夜初更向蘇家峴進行十餘里見村前火光知賊屯踞未動潛起撲之賊覺驚號遽滅其火是時夜黑不辨賊數多寡惟視火光明處轟擊賊眾亂竄人馬自相蹂躪分向店頭而遁適董玉春率所部由四溝裏橫截而出斬馘尤多正收隊閒遙聞偏橋一帶槍礮聲知張大雄周玉林劉甫田等正在接仗周紹濂率隊向西布莊前進半路接探報知賊以四五百騎抗拒張大雄等營步賊急護所掠之牲糧向趙家寨王家莊而遁已經張大雄劉甫田周玉林前後夾擊斃賊甚多步賊盡棄所掠牲糧潰走周紹濂飭毛正明迅扼黎原而自率中

營馳赴張寨時則皓月東升霜華皎潔遙見逆騎紛馳而來周紹
濂麾各軍前截後追頃刻賊屍枕藉其墜坑落塹死者亦無數計
共斃賊千餘名生擒十餘名訊知逆目舒阿渾已於陣前轟斃矣
兩路分竄之賊殲除殆盡僅餘百餘騎投歸店頭大夥其首先竄
過之賊約二三百騎則已竄至洛川澄城郃陽白水等處倏隱倏
見尙未捕斬淨盡此周紹濂一軍截勦中部宜君竄掠之回逆兩
獲勝仗之情形也十九日回逆數千突入甘肅慶陽府屬正甯縣
城知縣黃紹薪率防勇巷戰正苦不支賊以空城荒寂一無所掠
旋亦退去新授陝安道黃鼎福建候補知府劉倬雲聞警各率所
部馳援二十一日黎明劉倬雲行抵正甯四村原上甫成列而賊
騎數百突至副將劉忠發祝鑑嵩督隊奮擊立斃賊數十名賊卽
向南主原紛竄劉倬雲令兩營列隊千家村自率各營列陣前進

行抵正甯縣南見城上旗幟森然知黃鼎之軍已至矣劉倬雲以正甯兵力已厚而三水縣職田鎮空虛立飭四營收回三水自率親兵與總兵徐萬福助黃鼎勦北原之賊正拔隊閒忽三水老營報到午刻突來大股回逆竄至職田附近之羊坡頭阿塔坪等處肆掠距職田不過數里劉倬雲急率隊回援三鼓後回營料賊敗必由大灣南莊槐樹坡關家川苜蓿嶺而遁令劉忠發祝鑑嵩及都司王蓋臣伏於關家川扼之自率四營向羊坡頭進勦天明抵羊坡頭列方陣分左右進遇賊探騎擊敗之各村之賊齊出抗拒總兵周玉堂徐萬福都司李躍騎等奮威衝殺斃賊數百名賊向大灣疾遁劉倬雲知前路逼仄催軍猛擊賊擠墜澗壑者無數官軍追出谷口截賊爲二其大股向關家川鼠竄適劉忠發祝鑑嵩王蓋臣等馳至賊正回頭抵拒追軍不虞劉忠發等從關家川溝

中突起震懼失措官軍兩面夾擊斃賊又數百名日暮收隊計共斃賊千餘名生擒二十餘名軍前正法奪騾馬二百餘匹黃鼎於二十一日由邠州世店馳援正甯沿途遇賊卽擊約斃賊百數十名收隊入城二十二日追賊文家川知羊坡頭之賊已經劉倬雲擊敗收隊回邠州而連日接據各路探報逆騎數大股分擾邠州三水北境永樂堡底廟鎮澆場麻園東西牛家堡一帶黃鼎擬俟賊蹤稍定擊之二十七夜三鼓出隊馳四十餘里天明上永樂原見騎賊方攻陷師家河堡寨搬運糧食黃鼎飭參將林定遠截之而親率三營徑擣底廟之賊甫至底廟原適師家河賊已經林定遠擊敗由店子阿向底廟竄來副將李玉春卽率親軍扼之而林定遠又自後猛躡而至賊窘蹙莫支皆棄馬跳巖求免官軍併力轟刺無得脫者總兵章占雄徑攻底廟原賊方憑堡穩抗而麻園

之賊又至知縣雷炯督隊截之正鏖戰間韋占雄已督隊躍上堡牆堡中羣賊冒死由後門竄走併入大股維時總兵徐占彪副將陳春萬趙興隆皮昌魁率所部各營已破東牛家堡永樂堡之羣賊均奔集底廟騎賊約四千餘步賊約七八百見官軍僅四營在底廟遂四路齊撲兩營黃鼎布方陣屹立不動調林定遠遊擊何玉超從右路澆場鈔出賊後親督兩營拾方陣而進遇賊撲進則槍礮四面轟之賊卽旋卻旋前槍礮亦再接再厲斃賊甚多賊向後路狂奔適遇林定遠何玉超馳至賊懼不得脫復分投抗拒官軍夾擊之其向寺村旁竄者黃鼎麾所部截斷二百餘騎殲賊而奪其馬追至寺村賊紛紛下宮河原竄遁冰凝路滑跌斃又多乃收隊回底廟而徐占彪等由底廟牛家堡收隊回營亦殲賊百餘名計黃鼎一軍是役共殲賊千數百名奪戰馬二百餘匹生擒土

餘名而官軍陣亡馬隊隊長儘先副將胡占魁勇丁之帶重傷者五十二名維時劉倬雲率隊由職田馳至適遇敗賊從四村竄向郭家村卽整隊截擊復斃賊數十名訊據生賊供稱此次竄擾邠州三水北路之賊係回目白彥虎馬長順鄒阿渾等各股其禹得彥崔偉卽崔三陳林馬正和等逆酋則方赴隴州求撫其黨赴水羅城一帶擄糧未與俱來此劉倬雲黃鼎兩軍十一月二十二日十三二十八日擊敗董志原逆回大獲勝仗之實在情形也其另股渡涇河而南者擾及長武靈臺兩縣北路二十七日陝西提督雷正綰督同總兵閻定邦先擊長武北路之賊行抵封頭堡卽與賊遇雷正綰閻定邦督率衝殺立斃悍賊數十名賊卽敗潰沿途追殺共計斃賊二百餘名生擒逆回馬順兒虎秀哩正法奪獲騾馬二百餘匹賊奔回董志原老巢適涇州知州林發深飛報回逆

撲涇州甚急雷正綰卽率所部援剿二十八日馳抵涼州二十日
鋪賊已聞風遠遁涇州解嚴此股似卽馬正和等分出掠食黨夥
生擒賊供水羅城擄糧之賊也竊維董志原回逆號稱十八營則
日馮君福楊文智馬生彥三逆已竄入金積堡所有夥黨均歸併
白彥虎馬長順等其禹得彥崔巍馬正和陳林等在諸回酋中頗
稱桀黠見因屢次出巢掠食均經官軍痛剿飢蹙日甚況同甘肅
清水縣已撫回日李得昌由隴州遞稟前來臣等公同閱看情詞
似非虛妄然撫之爲難較甚於剿雖未便概予峻拒絕其就撫之
機亦未可遽許招安墮其緩剿之計除仍開誠曉示外仍飭各軍
迅速轉運芻粟約期移營進逼慎以圖之上諭軍機大臣等左
宗棠等奏官軍剿賊疊勝情形一摺剿辦尙爲得手惟洛川澄城
邵陽白水等處尙有賊騎出沒著仍飭周紹濂實力搜捕悉數殲

除並飭成定康將竄向清澗之賊迅速追剿董志原賊匪雖已被擊回巢而來去無定仍當督飭各軍分投堵剿遇賊卽擊毋令深入陝境其榆林一帶及邊外竄匪雖經金順督軍追剿而後路必須有兵策應杜其續竄之路使邊外之賊勢成孤立較易殲除且延榆綏沿河一帶尤必隨處有兵截擊庶不至竄越鄰疆左宗棠庫克吉泰劉典務當妥籌兼顧以維全局回目禹得彥等遞稟乞撫未必可恃該大臣等當嚴飭諸軍奮力進剿懾以兵威察其真心悔罪酌量收撫方爲一勞永逸之計陝甘賊匪頭緒紛繁應如何入手次第翦除之處著左宗棠等熟籌方略迅圖大舉毋稍遷延左宗棠另片奏彭玉麟於水師月餉贏餘項下撥解該督軍營銀二萬兩尙屬能顧大局又片奏遊擊丁汰洋所部勇丁缺額甚多查圖冒餉著卽於軍前正法以肅軍律將此由六百里各諭令

知之○玉通請給青海蒙古王公累年俸銀允之○予安徽陣亡
總兵官郝光甲直隸殉難從九品王緒等建祠○庚申申諭各省
禁種罌粟○予故江蘇淮海道吳葆晉建祠○壬戌 上詣 大
高殿祈雪○諭軍機大臣等李鶴年奏宋慶全軍馳抵清化改道
前進一摺宋慶一軍抵清化後經鄭敦謹飭令由直省井陘一帶
入晉該提督由清化改道又須折赴東路從衛輝彰德兩府取道
入直行程未免紆折歸綏防務極關緊要亟盼該提督前往以資
厚集著鄭敦謹李鶴年檄催宋慶統帶所部星速赴防定安即派
員迎提俟該提督到後應令扼紮何路相機進剿之處即著妥爲
調度宋慶一軍沿途應需芻糧著鄭敦謹飭屬妥爲供應儻因兵
食缺乏師行遲滯致誤戎機恐該署撫不能當此重咎也將此由
五百里各諭令知之○諭崇實吳棠奏川軍援黔克復黃平舊州

兩城並牛場勦賊情形各摺片黃平舊州兩城居鎮遠都勻之中縱橫數百里悉爲苗逆占踞見今唐炯督軍深入疊破關隘克復城池勦辦甚爲奮勉該逆以屢經懲創復敢糾黨圖襲牛場竄安擾我後路雖經官軍馳救擊退而見在進規清平地險賊眾必應厚集兵力穩紮穩進以期節節掃蕩崇實吳棠見已調陳希祥一軍馳赴下游著卽飭令會合唐炯等軍併力進勦迅掃逆氛俾苗疆早得戡定安平股匪奔竄卽岱並著檄飭成耀星嚴扼各隘如遇賊匪回竄卽行探蹤截擊毋稍鬆勁張文德一軍克復都勻後曾否將毛坡賊巢攻拔著曾璧光飭令聯絡川楚各軍迅速進兵以資厚集將此由六百里各諭令知之○諭蘇鳳文奏官軍攻勦苗匪獲勝一摺貴州九阡苗匪屢次滋擾粵西邊界經蘇鳳文派令副將孔憲隆前往防勦將竄擾河池等處賊匪擊退邊境獲安

旋與黔軍定期調派兵練進圖九阡老巢由洞塘進紮巴灰攻毀
賽糾苗寨勦辦尙屬得手惟水洞孟塘各寨尙多踞匪必須次第
攻克方可直搗九阡埽其巢穴著蘇鳳文嚴飭孔憲隆等會同黔
軍節節埽蕩迅殄逆氛曾璧光務當檄令該省帶兵員弁乘粵軍
在境併力夾攻毋稍觀望慶遠各屬蘇鳳文仍飭地方官會同防
軍嚴密守禦毋令該逆回甌另片奏勦辦吳亞終股匪疊勝等語
太平官軍連破那仰等處賊寨殺賊甚多並收復派嶺等村賊勢
見已衰弱著馮子材乘此聲勢迅督各軍相機雕剿一面清除內
匪免致該逆暗中勾結仍不得以驅賊出境爲辭敷衍了事卽著
蘇鳳文會商馮子材慎遵前旨添募兵勇分道越境往剿以期永
靖邊疆將此由五百里各諭令知之○飭劉岷迅解廣西軍餉○
予貴州陣亡副將石萬和等祭葬世職○癸亥諭軍機大臣等都

興阿奏蒙古台吉句匪聚擾請飭拏送一摺賓圖王旗台吉托克托虎糾集匪徒宋四閻王鄭五楊四藍三等三百餘人以防程廣學等復仇爲名在東魯地方大肆搶掠並在光定營子五成店等處憑圍屯聚經都興阿派員馳赴賓圖王府根究該王西哩巴咱爾派令章京入圍開導托克托虎抗不遵諭決意打仗似此聚眾構釁啓不畏法若不嚴拏懲辦何以儆兇頑而靖邊圉著理藩院傳知西哩巴咱爾將托克托虎等拏送歸案並著伯彥訥謨祜派員前往光定營子地方幫同查拏不准一名漏網都興阿仍飭德昌等統帶勇隊駐紮哈立套力改街勤加密探設法捕拏務期趕緊弋獲歸案究辦將此諭知理藩院並由四百里諭令都興阿知之○甲子諭軍機大臣等定安等奏官兵截剿撲河竄匪獲勝情形一摺此次杜嘎爾督率達爾濟等迎剿逆匪擒斬多名該逆見

我軍整隊齊進翻山逃遁仍竄回十里長灘雖未將全股殲除兇鋒已挫著定安等仍飭杜嘎爾等覘賊所向奮力攻剿務期盡殲醜類毋任東趨包頭河西踞匪千餘名由西山觜迤西搶入後套漸向舍太一路竄擾著一面檄飭馬陞盡心守禦以遏逆氛並著飭令威遠隊進紮薩拉齊地方與該總兵聲勢聯絡加意嚴防金順前奏帶兵東趨府谷著該副都統仍遵前旨體察情形如邊內兵力已厚卽繞出邊外與歸綏各軍合力埽蕩將此由五百里各諭令知之○乙丑兵部奏遵議甯夏將軍穆圖善處分得旨著加恩改爲革職畱任○諭刑部將朝審緩決三次以上人犯減等治罪○永定河工竣○丙寅諭軍機大臣等福濟錫綸奏叛賊蔓延請調援兵一摺布倫托海叛民變亂日久蒙兵旣不能用民勇又無從招募以致欲剿無兵見在悍賊雖止三百餘人脅從不過七

八百人而厄魯特十蘇木人心渙散棍噶扎勒參招集之兵耗餉無功聽賊蔓延燎原立見亟宜派兵剿辦以遏亂萌文麟帶勇已抵哈密著先其所急於此項練勇內調撥一千名或五六百名選派妥實營官帶至科城交福濟錫綸統率西進剿撫兼施以期早日肅事著文麟景廉迅籌辦理將此由五百里各諭令知之○諭總理各國事務衙門奏接據英國照會據實奏聞一摺洋弁在臺灣違約妄爲前經總理衙門照會英國使臣辦理見據該國使臣阿禮國照覆以一切情形未據臺灣領事詳報若確情果與所奏相同必將該領事暨洋將責處其索去之洋銀亦爲辦理退還並稱吉領事已解任兩月見咨請本國水師提督派員總管兵船前赴臺灣會同卹領事與地方官妥速辦結是該使臣亦屬自知無理惟以英民在臺久受冤抑地方官不早爲申理致釀巨案其意

直以辦理失宜歸咎於地方官自占地步設將來該領事所報與英桂等前奏不符該使臣必將藉端抵賴著英桂卞寶第懷遵前旨迅將此案始末情形確切查明咨報該衙門覈辦至洋人在臺有無冤抑之處一併據實陳明均不得迴護粉飾俾該使藉口狡展庶辦理方有把握原摺著鈔給閱看將此由五百里各諭令知之○林壽圖回籍養親以翁同爵爲陝西布政使英祥爲四川按察使

由湖北安襄鄖荆道遷

○免江蘇荒地錢糧○飭江蘇廣東等省迅解

陝西協餉○飭山東補解運河工程銀兩○諭文麟等撥兵協剿布倫托海叛賊○予廣西陣亡巡檢谷集榮等祭葬世職○丁卯諭軍機大臣等劉嶽昭奏攻剿尋甸賊匪獲勝一摺回逆盤踞尋甸爲省城賊匪聲援經劉嶽昭督軍進剿收復果馬一帶地方並在塘子張徐灣等處擊賊疊勝尋賊復環築碉樓負隅抗拒官軍

分道並進攻其附郭賊壘賊勢已孤而富民逆回膽敢率黨來援自應添兵痛加剿洗該督見已派令道員劉嶽曙統帶所部馳往援剿並親赴尋營調度著卽嚴飭諸軍迅將此股援賊盡數截殺毋令蔓延一面督率各營併力攻城期於速拔不得曠日持久致誤戎機見在激江府城業經岑毓英派員克復若得尋甸速下則官軍聲勢聯絡更易得手省城之圍不難立解該督撫其隨時互相策應迅奏膚功尋甸克復後劉嶽昭務當乘勝掃蕩直前毋稍遲滯將此由五百里各諭令知之○追予山東冠縣陣亡道員秦聚奎諡剛烈○予雲南陣亡參將李克昌等祭葬世職○戊辰諭軍機大臣等棍噶扎勒參奏賊匪近情索倫等官兵來營日期暨請安插厄魯特人眾各摺片索倫等眾前據榮全奏稱已抵雅爾王爾地方並令霍伽布索同該人眾趕往塔爾巴哈台境內度冬

茲據棍噶扎勒參奏稱旗綠索倫厄魯特等營官兵一百零四員
名到營在各喇嘛處湊借銀兩梭布爲該官兵黏補衣服餬口之
資等語索倫人眾此時度可行抵塔境轉瞬雪融春暖自可按程
言旋應如何接濟銀兩多備騎馱及到何處安插撥給耕籽牛隻
之處著麟興榮全錦丕勒多爾濟福濟錫綸悉心籌商妥爲辦理
不至顛沛失所此次棍噶扎勒參湊借銀兩梭布等項並著麟興
榮全錦丕勒多爾濟福濟錫綸按照該呼圖克圖所墊數目趕緊
籌還以免苦累至所稱厄魯特人眾與杜爾伯特原係一脈若令
遷移該處一切均有所賴其歲支錢糧仍照舊章歸科布多大臣
辦理此項人眾願歸杜爾伯特是否出於真情抑另有他處可以
安插卽著福濟錫綸斟酌情形妥爲安插毋令日久弊生布倫托
海叛賊蔓延亟應及早勦洗昨已諭文麟等撥兵援剿福濟錫綸

一俟哈密兵勇到時卽行統率西進迅殄賊氛不可因循致誤棍
噶扎勒參摺片各一件均著鈔給閱看將此由五百里各諭令知
之○庚午以給祭 太廟 上前期親詣行禮○諭軍機大臣等
鄭敦謹奏沿河擊退竄匪永甯渡河之軍剿賊大勝定安等奏南
北官軍擊退踞匪並請由神木截剿各摺片晉省沿河西岸北自
包頭南至鄉吉到處賊匪紛至沓來窺伺河干張曜已至河曲分
兵渡河金順由十里長灘北進會軍進剿大甯永和臨縣等處竄
匪陳湜等往來縱擊各路均有斬擒該匪紛紛回竄仍著定安桂
成鄭敦謹嚴檄在事各員弁盡力追剿毋稍鬆勁一面穩慎設防
晝夜守禦不可爲賊所乘劉松山一軍由永甯州過河於小理川
大理川等處蹋平賊巢二十餘處斃賊無數敗匪南竄該提督統
兵過河獲此大捷洵屬奮勇可嘉著左宗棠仍飭劉松山統帶全

軍再向西南壓剿迅殄賊氛以竟全功十里長灘及東北一帶踞匪經金順等軍分路剿洗向西敗竄距托清較遠距薩尙近著定安等檄飭馬陞沿河實力堵截咨會杜嘎爾飭令達爾濟烏爾圖那遜竭力追剿與金順張曜等會合夾擊以收聚殲之效逆匪敗遁西竄勢必沿邊鋌走榆林神木一帶亟須有重兵截剿金順見已帶隊折回神木著卽相機進兵迎頭剿辦並著鄭敦謹飛催宋慶趕赴太原就近馳赴神木出邊截剿宋慶前有從衛輝彰德兩府取道入直之說著官文李鶴年沿途飛催趙程前進毋得稍涉遲延致誤戎機將此由六百里各諭令知之○都興阿覆陳查勘邊地情形諭令妥籌辦理○廣湖南衡州府學額五名湖北棗陽縣八名○壬申諭軍機大臣等金順奏官軍截剿偏河大股踞匪疊勝河保解嚴見回榆林察看賊蹤剿辦一摺此次逆匪窺伺河

干經金順由十里長灘進剿疊獲大勝斃賊甚多前據定安具奏已諭知該副都統相機剿辦見在逆蹤西竄已至烏龍堡等處榆郡空虚難保不希圖撲犯劉厚基既回榆林該副都統亦帶隊同到卽著和衷商辦相機截剿張曜此次赴援迅速並馳至邊外古城地方與金順會商進剿機宜洵屬勇往並著金順隨時籌商聯爲一氣以資策應儻有大股賊蹤竄近卽行分路夾剿以靖地方另片奏請飭綏遠籌解駝隻等語陝北轉運艱難需駝甚亟卽著定安等於伊克昭烏蘭察布錫林郭勒三盟內籌辦駝三千隻配帶鞍繩於來年正月解赴榆林以資轉運將此由六百里各諭令知之○允河南截留湖北京餉二十一萬兩賑濟災民○是月豁免山東泰安等七府州河南汝甯等四府州被擾積欠額賦蠲緩浙江海甯等六十二州縣杭嚴等三衛被水被旱被風被雹新

舊漕糧暨仁和等六場被擾竈地錢糧江蘇泰州等三十五州廳縣淮安等五衛被水被旱新舊漕糧額賦太倉等二十七州縣蘇州等五衛被水新舊額賦雜課山西薩拉齊等八廳縣被水被擾新舊額賦陝西邠州等六十州廳縣被水舊欠額賦河南淮州等十九州縣被水本年漕糧額賦緩徵直隸永清等三縣被水新舊額賦並減免差徭安徽壽州等四十八州縣被水被旱被蟲武昌等二衛被水被旱新舊額賦江西義甯等二十六州廳暨九江同知所屬被水被旱被蟲新舊額賦○是歲朝鮮入貢○會計天下民穀數除直隸江蘇安徽福建湖北湖南陝西四川廣西雲南貴州未經冊報外奉天等省通共大小男婦二萬三千八百十八萬一百三十五名口存倉米穀二百九十萬八千二百四十七石三斗六升一合五勺